

## **KORINHTUQ**

### **Pê Chyáng Hî Dàm Hun Kat é Laiká (1 Corinthians)**

<sup>1</sup> Garai Gasang ô nau é eq rajung za, Hkrisduq Yesuq é lagyo dut râ matú ji yù huí é sù ngò Poluq eq, ngamoq é gumang hpó Sositeni gi,

<sup>2</sup> jowò hkangmó má nga-nhông é Yhumsîng Yesuq Hkrisduq é myìng lé lîng é bang eq rahá, chyoyúng bang dut râ matú ji yù huí é eq Hkrisduq Yesuq má lhoq sân-yúng é huí é bang nghut é, Korinhtuq myuq mâ é, Garai Gasâng é noqkuq hpúng lé, dang kyô kat lhê; Hkrisduq gi, ngamoq é eq yhangmoq é Yhumsîng nghut lhê.

<sup>3</sup> Nga-nhông é Îwa Garai Gasang eq Yhumsîng Yesuq Hkrisduq chyáng mâ é jeju eq ngingón hkyô gi, nungmoq chyáng ru joq nyî sháng gaq ô.

#### *Hkrisduq É Yanmai Wó É Jeju*

<sup>4</sup> Garai Gasâng jeju lé Hkrisduq Yesuq dông mai nungmoq lé byi bê nghut mù luí, ngò gi, nungmoq é matú Garai Gasang lé ayang jeju hkya-ôn nyi lhê.

<sup>5</sup> Hkâsu mù gâ le, nungmoq gi, Hkrisduq dông mai, nungmoq dang taí é hkyô banshoq eq nungmoq é sumsé hpaqchyî banshoq má je lhoq gumjup é hui bekô nghut ri.

<sup>6</sup> Haù gi, Hkrisduq Yesuq eq séng luí, ngamoq saksé hkâm é hkyô têng é lé, nungmoq chyáng shit nyi é nghut lhê.

<sup>7</sup> Haù mù, nga-nhông é Yhumsîng Yesuq Hkrisduq dum htoq shit râ lé, nungmoq gyai myoqbyu

láng nyi é u má, nungmoq gi, woi-nyí hkyô eq sêng é chyunghuq hai lé le langhpyut kó râ a nghut.

<sup>8</sup> Nga-nhông é Yhumsing Yesuq Hkrisduq é buinyi má, nungmoq lé mara hùn râ hkyô a bò shoq, Hkrisduq gi, nungmoq lé, htàng shoq gíngtíng nhang nyi râ nghut lhê.

<sup>9</sup> Nga-nhông é Yhumsing nghut é Yhang Zo Yesuq Hkrisduq eq rahá zùm yap râ matú, nungmoq lé ji yù bê sù Garai Gasang gi, lhumzui Sù nghut ri.

### *Noqkuq Hpúng Má Gam Hkoq Lhâm É Hkyô*

<sup>10</sup> Gumang wui ê, nungmoq hkaû má gam hkoq lhâm é hkyô pé a joq é za, nungmoq é myit eq myit sôn wú é hkyô má gumjup shoq rading ralhum za dut nyi sháng gaq, nungmoq lhunglhang bang rayuq eq rayuq byìn hpyé gohut huí nyi keq nghú, ngò, nungmoq lé, nga-nhông é Yhumsing Yesuq Hkrisduq é mying mai dúng tôngbán kat lhê.

<sup>11</sup> Ngá é gumang wui ê, Hkloe é yhâm byù wui gi, nungmoq hkaû má mabyoq htoq hkyô joq é lé, ngo lé hkyáng lo shit akô.

<sup>12</sup> Ngò haû su nghú taí é gi, nungmoq mâ é rayuq yuq gi, "Ngò gi, Poluq htàng châng lhê." ga, góyuq gi, "Ngò gi, Apolo htàng châng lhê." ga, dum rayuq gi, "Ngò gi, Kehpa htàng châng lhê." ga, dum góyuq gi, "Ngò gi, Hkrisduq htàng châng lhê." ga, taí bùm kó é yanmai nghut lhê.

<sup>13</sup> Hkrisduq gi, gam hkoq é hui bê lhú? Ngò Poluq gi, nungmoq é matú tapzîng má jén sat é hui bê lhú? Nungmoq gi, ngá é mying mai wui-myhup hkâm yù kô é lhú?

14 Ngò gi, Krispu eq Ge-u nhik mai lai luî, nungmoq ó yuq lé le wui-myhup a hkám byî wú é yanmai,

15 nungmoq ó yuq le, ngá é myìng mai wui-myhup hkâm yù bê nghû a wó tai é nghut mù, ngò, Garai lé jeju hkya-ôn lhê.

16 (Stehpana é yhumbyù wuì lé le, ngò wui-myhup hkám byî é nghut lhê, haû mai lai luî gotú ó lé hkám byî záng ashî laq, ngò a myit bun lo nghut ri.)

17 Hkâsu mù gâ le, Hkrisduq, ngo lé nhang kat é gi, wui-myhup hkám byi râ matú a nghut, gabú danglù hko kyo râ matú sheq nhang kat é ru nghut lhê; nghut kôlhang, waxâng zô wui é hpaqchyî byéng-yá dang dông hko kyô é a nghut mù, Hkrisduq é tapzing é a-tsam gi, akôm a dut byuq é nghut lhê.

### *Garai É A-tsam Eq Hpaqchyî Byéng-yá Gi, Hkrisduq*

18 Hkâsu mù gâ le, tapzîng má Yesuq shî hkâm é hkyô eq sêng é danglù gi, htên byoq hui râ bâng é matú, danggang dut byuq ri; nghut kôlhang, hkyi yu é huì nyi bang nga-nhông é matú gi, Garai Gasâng é a-tsam nghut ri.

19 Hkâsu mù gâ le, Chyúmdang má kê tô é gi, "Hpaqchyî bò bâng é hpaqchyî byéng-yá lé, Ngò lhoq htên pyám râ nghut lhê; nyan bò bâng é nyan lé, Ngò, ajè dut pyám nhâng râ nghut lhê."✧

ga ri.

<sup>20</sup> Hpaqchyî byéng-yá bò bang gi, hkâmá lhú? Hpaqchyî laiká kung bang gi, hkâmá lhú? Ipyat shi é dang tái kung bang gi, hkâmá lhú? Garai Gasang gi, mingkân é hpaqchyî byéng-yá lé lhoq ngok pyám bê a nghut lhú?

<sup>21</sup> Hkâsu mù gâ le, Garai Gasâng é hpaqchyî byéng-yá mai ga jang, mingkan zo wui gi, yhum-sing é hpaqchyî byéng-yá dōng mai Garai Gasang lé a wó sé kô é yanmai, danggang gâ pyám byi kô é mungdang lé hko kyô é dōng lumjing bang lé hkyi yù rā matú, Garai Gasang myit hpyit é nghut lhê.

<sup>22</sup> Yudaq byu pé gi, limik kumlhá pé lé dūng akô; Grik byu pé gi, hpaqchyî byéng-yá lé ho akô nghut ri.

<sup>23</sup> Nghut kōlhang, ngamoq gi, tapzing má jén sat huí é Hkrisduq é hkyô lé hko kyô lhê. Haû gi, Yudaq byu pé é matú myit leqbat jowò eq tungbaù pé é matú danggang dut byuq ri.

<sup>24</sup> Nghut kōlhang, Garai Gasâng eq ji yù huí é Yudaq byu pé eq Grik byu pé é matú, Hkrisduq gi, Garai Gasâng é a-tsam eq Garai Gasâng é hpaqchyî byéng-yá nghut ri.

<sup>25</sup> Hkâsu mù gâ le, Garai Gasâng é ngok hkyô gâ é lhang gi, byu é hpaqchyî byéng-yá htoq má je gyaú ri; Garai Gasâng é wum nyhóm hkyô gâ é lhang gi, byu é wum-o htoq má je gyaú ri.

<sup>26</sup> Gumang wui ê, Garai Gasang, nungmoq lé ji yu é hkûn, nungmoq hkâsu dut nyi é hkyô lé myit wú keq. Waxâng zô wui é nyi yap a-tsang dōng hpaqchyî byéng-yá bo é bang, ahkáng ayá wó é bang, zaugun suwún amyû mâ é bang a myô é nghut lhê.

<sup>27</sup> Nghut kōlhang, Garai Gasang gi, hpaqchyî

byéng-yá bò bang lé hoq lhoq hpu râ matú, mingkan mâ é ngok bang gâ é lé hkyin yu é nghut lhê; Garai Gasang gi, wum bò bang lé hoq lhoq hpu râ matú, mingkan mâ é wum nyhóm bang gâ é lé hkyin yu é nghut lhê.

<sup>28</sup> Yhang gi, mingkân èq ahkyak tô é lé lhoq htên pyám râ matú, haî a nghut é lé le, mingkan mâ é aróng a bo é eq wú tiq pyám huî é lé le, hkyin yu é nghut lhê.

<sup>29</sup> Haû gi, ó yuq le, Yhâng é hí má a ge nghutbun râ matú nghut ri.

<sup>30</sup> Garai Gasâng é yanmai, nungmoq gi, Hkrisduq Yesuq má nghut nyî bekô nghut ri; Hkrisduq gi, nga-nhông é matú, Garai Gasâng chyáng mâ é hpaqchyî byéng-yá dut bê nghut ri. Haû gi, nga-nhông é dingmán hkyô, chyoiyúng hkyô eq hkyi yù hkyô nghut ri.

<sup>31</sup> Haû mù luî, "Gumrong é sù gi, haû Yhumsíng má gumrông sháng gaq."✧ ga kê tô é eq rajung za nghut ri.

## 2

### *Woi-nyí Mai Lo É Garai Gasâng É Hpaqchyî Byéng-yá*

<sup>1</sup> Gumang wuì ê, ngò gi, Garai Gasang eq sêng é saksé hkyô lé nungmoq chyáng taî pyô râ matú jé lé é hkùn, dang taî kùng é eq hpaqchyî byéng-yá mó bo é dòng lé é a nghut.

<sup>2</sup> Hkâsu mù gâ le, ngò, nungmoq eq rahá nyi é u lé, Yesuq Hkrisduq eq Yhang tapzîng má jén sat huî

---

✧ **1:31** Yer 9:24

é hkyô mai lai luî, jung hkgangmó lé tô-myhî pyám râ nghû myit hpyit yû bê nghut lhê.

<sup>3</sup> Ngò gi, nungmoq chyáng jé lé é hkûn, wum nyhôm é eq gyai yhang gyuq nán é nghut lhê.

<sup>4</sup> Ngá é danglù eq ngò hko kyô é hkyô gi, hpaqchyî bo é eq mhuî yu é dang pé dông a nghut é za, Woi-nyí é a-tsâm eq nungmoq lé shit é dông ru nghut mù,

<sup>5</sup> nungmoq é lumjîng myit gi, byù é hpaqchyî byéng-yá má a nghut é za, Garai Gasâng é hpungwup a-tsam má nghut nyi lhê.

<sup>6</sup> Nghut kôlhang, ngamoq gi, myit dîng bê bang lé hpaqchyî byéng-yá dông nyo lhê; shí pyat lhê é hpaqchyî byéng-yá eq htên byoq nyi huî é shí pyat mâ é zau wui é hpaqchyî byéng-yá dông kúm a nghut.

<sup>7</sup> Ngamoq taî é gi, haq tô é eq, ahkyíng ngu é lháng a joq shi mai nga-nhûng é hpungwup shingkâng é matú Garai Gasang tô to byî é hpaqchyî byéng-yá nghut é, Garai Gasâng é zau tô é hpaqchyî byéng-yá lé taî é ru nghut lhê.

<sup>8</sup> Shí pyat lhê é zau wuî gi, hpaqchyî byéng-yá haû lé rayuq lháng a sê gyo kó nghut ri; yhangmoq sê gyo kô é ru nghut le gi, hpungwup shingkang bo é Yhumsîng lé tapzîng má jén sat pyám kó râ a nghut.

<sup>9</sup> Nghut kôlhang, Chyúmdang má,  
 "Ó yuq èq le a myang wú, ó yuq èq le a wó gyô wú,  
 ó yuq èq le a bûn myit wú é hkyô lé, Garai Gasang gi, Yhang lé chyitdap bâng é matú lajang to byi bê nghut ri."☆

---

☆ 2:9 Esai 64:4

ga kê tô é eq rajung za nghut ri.

<sup>10</sup> Nghut kôlhang, Garai Gasang gi, haú hkyô lé, Yhâng é Woi-nyí dông nga-nhúng lé hpông shit bê nghut ri.

Woi-nyí haú gi, jung hkgangmó lé ho gôn wú é nghut lui, Garai Gasang é zaú tô é hkyô lé lhang ho gôn wú é sù nghut ri.

<sup>11</sup> Byù má lúng é woi-nyí za a nghut jang gi, byù rayuq myit é hkyô pé lé, ó yuq wá wó sê lhê lú? Haú eq rajung za, Garai Gasang é Woi-nyí za a nghut jang, Garai Gasang myit é hkyô lé, ó yuq le wó sê é a nghut.

<sup>12</sup> Nga-nhúng gi, mingkân é woi-nyí lé hap yu tô é a nghut é za, Garai Gasang eq nga-nhúng lé byí to bê jeju lé, ngamoq wó sê gyo râ matú, Garai Gasang chyáng mâ é Woi-nyí lé sheq hap yu tô é ru nghut lhê.

<sup>13</sup> Haú mù lui, ngamoq gi, waxang zô wui é hpaqchyí byéng-yá eq mhoq byí é dang dông taí é a nghut, Garaí é Woi-nyí eq mhoq byí é dang dông taí é sheq ru nghut mù, woi-nyí eq sêng é tengmán hkyô lé woi-nyí eq sêng é dang dông taí sân kyô é nghut lhê.

<sup>14</sup> Haú Woi-nyí lé a wó é sù gi, Garai Gasang é Woi-nyí mai lo é hkyô pé lé a hap yu é nghut lhê; haí mù gâ le, haú pé gi, yhâng é matú ngok é hkyô nghut lui, woi-nyí hkyô dông mai haú hkyô lé a wú é yanmai, yhang gi, haú pé lé a wó sê gyo nghut ri.

<sup>15</sup> Woi-nyí eq sêng é byù gi, lhunglhang lé wó jéyang lhê, nghut kôlhang, yhang lé kum gi, ó yuq eq le wó jéyang é a nghut.

<sup>16</sup> Chyúmdang má,

"Hkâsu mù gâ le, ó yuq wá, haû Yhumsing é myit lé sé mù, Yhang lé wó mhoqshit wú é lhú?"<sup>☆</sup> ga kê tô ri. Nghut kôlhang, nga-nhúng gi, Hkrisduq é myit lé wó é bang nghut lê.

### 3

#### *Noqkuq Hpúng Má Gam Hkoq Lhùm É Hkyô*

<sup>1</sup> Gumang wuì ê, hí hkûn, ngò gi, nungmoq lé, Woi-nyí eq sêng é bang lé đông wó taí é a nghut; mingkan eq sêng é bang đông nghut kômù, Hkrisduq má zonú su dut bang lé đông sheq taí wú é nghut lê.

<sup>2</sup> Nungmoq gi, zoshuq apat lé a wó zo shi kó nghut é yanmai, ngò gi, nungmoq lé naú byi huq é nghut lê.\* Ahkuì lhang, nungmoq gi, zoshuq apat lé a wó zo shi kó nghut ri.

<sup>3</sup> Nungmoq gi, mingkan eq sêng é bang ru nghut nyi ashí kó nghut ri. Hkâsu mù gâ le, manôn hkyô eq byoq lhum hkyô gi, nungmoq chyáng joq nyi é yanmai, nungmoq gi, mingkan eq sêng é bang nghut lê a nghut kó luq? Mingkan zo wuì su nyi yap bum lê a nghut kó luq?

<sup>4</sup> Rayuq gi, "Ngò gi, Poluq htâng châng lê." ga, góyuq gi, "Ngò gi, Apolo htâng châng lê." ga taí nyi bùm kê é nghut jáng, nungmoq gi, mingkan zo wuì nghut nyi bum lê a nghut kó luq?

<sup>5</sup> Apolo gi, ó wá nghut lê? Poluq gi, ó wá nghut lê? Nga-nhik gi, Garaí é dui-nhâng zoshâng za nghut luí, ó le ó lé, haû Yhumsing èq hun tô é muzó

---

<sup>☆</sup> **2:16** Esai 40:13      \* **3:2** *Nungmoq lé naú byi huq é, gâ é gi, lui é hkyô pé lé hí mhoq byí é lé gâ lê.*



eq rajung za wùn waq é nghut luî, nungmoq gi, ngá-nhik đông mai wó lumjîng kô é ru nghut lhê.

<sup>6</sup> Ngò gi, gabú danglù amyui lé hô kat, Apolo gi, wuì hpyun byi, nghut kôlhang, yuq kô lò nhang é gi, Garai Gasang za ru nghut lhê.

<sup>7</sup> Haù mù, amyui hô kat sù eq wuì hpyun byi sù gi, ahkyak mó a nghut, yuq kô lò nhang é Garai Gasang za sheq ahkyak ru nghut lhê.

<sup>8</sup> Amyui hô kat sù eq wuì hpyun byí su nhik myoqbyu tô é hkyô gi, rajung za nghut ri; nghut kôlhang, yhumsîng shikut é eq rajung za, ó le ô é shigyau chyunghuq wó yû kó râ nghut lhê.

<sup>9</sup> Hkâsu mù gâ le, ngamoq gi, Garai Gasâng é mù zui luzúm wuì nghut lhê; nungmoq gi, Garai Gasâng é yò, Garai Gasâng é yhûm nghut nyi akô.

<sup>10</sup> Garai Gasang, ngo lé byí to bê jeju eq rajung za, yhûm saí kung sù rayuq đông, ngò gi, yhûm apûn awang hi to bê nghut lhê; gotû byù gi, hau é ahtoq má saí toq jat nyi é nghut lhê. Nghut kôlhang, yuq hkgangmó gi, yhumsîng saí é má rago sidiq râ lhê.

<sup>11</sup> Hkâsu mù gâ le, hi to gù nghut é, Yesuq Hkris-duq ngu é yhûm apûn awang mai lai luî, ó yuq le, gotû yhûm apûn awang lé wó saí é a nghut.

<sup>12</sup> Yhûm apûn awang hau é ahtoq má, hîng, ngùn, hpaudap luggok pé, sik, mhan, hkowá pé lé chûng mù saí jat kô é nghut jáng,

<sup>13</sup> yuq hkgangmó é muzó hkâsu nghut é hkyô lé lhoq htoq shit é hui râ nghut lhê. Haì mù luî gâ le, haù Yesuq é Buinyì gi, haù lé byu-myàng nhâng mù, haù buinyì lé gi, myî èq lhoq htoq shit râ nghut lhê. Haù myi gi, yuq hkgangmó saí é muzó hkasû é nghut é lé chyam râ nghut lhê.

14 Rayuq yuq saî é yhûm gi, ru gêng nyi é nghut jáng, haú yuq gi, yhang é shigyaú chyunghuq wó yû râ nghut lhê.

15 Nghut kôlhang, yhûm haû nyé gyó byuq é nghut jáng, yhang gi, yhûm sôm byuq é hui zo râ nghut lhê; yhang gi, asak lut kôlhang, myishâm mai wó lut é byù su dut râ nghut lhê.

16 Nungmoq gi, Garai Gasâng é noqkuq yhûm nghut luí, Garai Gasâng é Woi-nyí gi, nungmoq má lúng nyí bê hkyô lé a sé kó lúh?

17 Rayuq yuq, Garai Gasâng é noqkuq yhûm lé lhoq htên é nghut jáng, Garai Gasang gi, haú yuq lé lhoq htên pyám rá nghut lhê. Hkâsu mù gâ le, Garai Gasâng é noqkuq yhûm gi, chyoiyúng lhê; nungmoq gi, noqkuq yhûm haû nghut akô.

18 Nungmoq gi, yhumsing gùng yhumsîng hkâlhoq nghoq kô. Nungmoq mâ é rayuq yuq, shí ipyat mâ é byù nyí a-tsâng dông hpaqchyí byéng-yá bò sù ga myit é nghut jáng, hpaqchyí byéng-yá akying bò sù wó dut sháng gaq, yhang gi, a-ngok sù dut râ lhê.

19 Hkâsu mù gâ le, mingkan shî mâ é hpaqchyí byéng-yá gi, Garai Gasâng é hí má ngok é hkyô nghut ri. Haû gi, "Garai Gasang gi, hpaqchyí byéng-yá bò bang lé, yhangmoq é hpaqchyí má yhang myí to nhang ri."☆ ga kê tô é eq rajung za nghut ri.

20 Hau htoq agó, "Haû Yhumsîng gi, hpaqchyí byéng-yá bò bang myit é hkyô pé akôm nghut é lé sê lhê."☆ ga le kê tô ri.

21 Haû mù luî, ó yuq le, byù eq sêng é hkyô má gyáng é dang a taí kó sháng gaq! Lhunglhang gi, nungmoq é chyat nghut lhê.

22 Poluq le, Apolo le, Kehpa le, mingkan le, dui nyi é hkyô le, shi é hkyô le, ahkuí lhê hkyô eq htângnùng mâ é hkyô le, banshoq gi, nungmoq é chyat nghut ri.

23 Nungmoq gi, Hkrisduq é nghut akô; Hkrisduq gi, Garai Gasâng é nghut ri.

## 4

### *Hkrisduq É Lagyô Pé*

1 Haû mù luî, byu pé gi, ngamoq lé, Hkrisduq é dui-nhâng zoshâng wui đông eq Garai Gasâng é zaú tô é hkyô pé lé taí pyô râ matú ap byî tô é hui bang đông sôn yù râ lhê.

2 Haú đông nghut jáng, ap byî tô é hui bang gi, yhumsing lhumzui hkyô lé saksé shit râ dut lhê.

3 Nungmoq eq nghut nghut, waxâng zô wui é tarâ rûng mai nghut nghut, ngo lé jéyáng kô le, ngá é matú atiq azo za nghut lhê; gè gè ga jáng, ngá gûng ngò lhang a jéyáng é nghut lhê.

4 Haî mù gâ le, ngá gûng ngò mara a bò bûn é nghut kôlhang, haû gi, ngo lé wó lhoq sân-yúng byî é a nghut. Ngo lé jéyáng é sù gi, haû Yhumsing nghut lhê.

5 Haû mù, masat tô é ahkying a jé shimá haî lé le a jéyáng é za, haû Yhumsing jé lé shoq, láng nyî keq. Yhang gi, mauchut hkaû má haq tô é pé lé byu-myàng nhâng mù, byu pê é myit nhiklhum má lúng é hkyô lé lhoq htoq shit râ nghut lhê. Haú hkûn,

yuq hkgangmó gi, ó le ó wó gíng é hkya-ôn hkyô lé, Garai Gasang chyáng mai wó yú râ nghut lhê.

<sup>6</sup> Gumang wui ê, ngò gi, "Kâ tô é gû mai hkâlai." gâ é sanghkyâng é lichyúm lé, ngamoq chyáng mai nungmoq wó mhoq yû sháng gaq nghû, nungmoq é akyu é matú, ngò eq Apolo má háu pé lé yù mù dangtú kut é nghut lhê. Háu hkûn, nungmoq gi, nghutbûn é dông, rayuq lé gi, wú ko, góyuq lé gi, wú shóm, a kut kó râ nghut lhê.

<sup>7</sup> Ó yuq wá, nang lé, góyuq eq shaî shoq kut lhê lú? Nang hap yu é a nghut le gi, wó râ lú? Nang, hap yu é nghut le gi, a hap yu é dông haî mù nghutbûn nyi lhê lú?

<sup>8</sup> Nungmoq gi, râ é lhunglhang gumjup bang nghut bekô hung! Nungmoq gi, wó bang dut gù nghut bekô hung! Ngamoq a lom é za, nungmoq gi, hkohkam pé dut bekô hung! Ngamoq le, nungmoq eq rahá hkohkam pé wó dut sháng gaq, nungmoq gi, gè gè yhang hkohkam pé dut to bekô râ lé, ngò hkâ-í yhang ô nau nyi lhê ô!

<sup>9</sup> Nghut kôlhang, sat râ matú doqdan huî é shúm byû pé lé su, Garai Gasang gi, lagyô pé nghut é ngamoq lé de de kut htoq shit bê nghû, ngò wó myit ri. Ngamoq gi, nyî mi-nyî, joq mijoq, maumang lagyô pé eq waxâng zô wui é hí má, wú kûn jung dông dut nhang é huî nyî gù bê nghut lhê.

<sup>10</sup> Ngamoq gi, Hkrisduq é yanmai ngok é bang dông sôn yu é huî kôlhang, nungmoq kúm gi, Hkrisduq má hpaqchyî gyaí bo é bang dông dut bekô hung! Ngamoq gi, wum nyhôm é bang dông sôn yu é huî kôlhang, nungmoq kúm gi, wúm bo é bang dông dut bekô hung! Nungmoq gi, hkunggâ é huî

akô; ngamoq kúm gi, hkunggâ é a hui nhung!

<sup>11</sup> Shí hkyíng shí u jé shoq, ngamoq gi, zòmut wuìshit huí é, mebu ajeq amyhâ dut huí é, nhuq bat huí é, yhumsing é nyì jowò a wó é bang nghut nyi lhê.

<sup>12</sup> Ngamoq gi, yhumsing loq èq yhang mù zui wum kat nyi lhê. Ngamoq gi, nhìng pyâm é hui jáng, shimân byi, zing-rî é hui jáng, jân pyám kut lhê.

<sup>13</sup> Ngamoq gi, lumù gansang é hui jáng, dang ngón dang nguí tû nyo lhê. Ngamoq gi, ahkuí jé shoq, myidàm htoq mâ é hpoqkyuq hpoqpyâng eq mingkân é buzaq pé dông sôn yu é huí nyi lhê.

<sup>14</sup> Ngò gi, nungmoq lé hoq lhoq hpu râ matú haú pé lé kê é a nghut, ngá é chyitdap zo wuì lé dông lhoq pùn kying râ matú ru nghut lhê.

<sup>15</sup> Nungmoq gi, Hkrisduq má mhoqshit bang ra mun wó kô é nghut kôhang, îwâ pé myo shoq wó kô é a nghut; hkâsu mù gâ lé, ngò gi, haú gabú danglù dông mai, Hkrisduq Yesuq má nungmoq é îwa dut é nghut lhê.

<sup>16</sup> Haú mù luí, ngò kut é su cháng keq nghû, ngò, nungmoq lé lung kat lhê.

<sup>17</sup> Hau é yanmai, ngò gi, haú Yhumsîng má lhumzui sù nghut é, ngò chyitdap é ngá zo dông nghut sù Timohti lé, nungmoq chyáng nhang kat é nghut lhê. Yhang gi, Hkrisduq Yesuq mâ é ngá é asak duì hkyô lé, jowò hkangmó mâ é noqkuq hpúng hkangmó lé ngò mhoq byî é eq rajung za, nungmoq lé lhoq pun byi râ nghut lhê.

<sup>18</sup> Nungmoq mâ é ra-am gi, nungmoq chyáng ngò a dum jé lé râ su ngam pyám kômù, nghutbùn byuq bekô nghut ri.

19 Nghut kôlhang, haû Yhumsîng gyô é nghut jáng, ngò gi, nungmoq chyáng hân za jé lé râ nghut lhê; haú hkún, ngò gi, nghutbún é byù haú bang haí taí é hkyô lé za a nghut, yhangmoq hai a-tsam wó é hkyô lé le gôn htoq râ nghut lhê.

20 Hkâsu mù gâ le, Garai Gasâng é mingdán gi, taí é dang má bo é a nghut, a-tsam má sheq ru nghut lhê.

21 Nungmoq hká đông ô nau akô lú? Ngò gi, nungmoq chyáng, nuichûm hkat èq, a nghut jáng, chyitdap é eq nú-nhâm é myit mai lé lô ra râ lú?

## 5

### *Ashop É Đông Gungsho Zùm Yap É Hkyô Kut É Sû Lé Lhoq Htoq Pyâm Râ Hkyô*

1 Nungmoq chyáng, ashop é đông gungsho zùm yap é hkyô joq é lé, hkyak taí hû lò bekô; haú gi, a lumjîng bâng chyáng lhang a dut wú é hkyô nghut é, yuqgè rayuq gi, yhangwâ é myiwe eq nyi zô lhum nyi é hkyô nghut ri.

2 Nghut kôle, nungmoq gi, nghutbún nyi bum akô nhung! Haú đông a nghut é za, nungmoq gi, yón é myit tân shit mù, haú su kut é byù lé, nungmoq é hpúng mai lhoq htoq pyâm le, a gè kó lú?

3 Ngò gi, ngá gungdu, nungmoq eq rahá a nyi to kôlhang, ngá é i-myt gi, nungmoq eq rahá nghut nyi luí, gungdu jé nyi tô é đông mai, haú hkyô kut é sù lé jéyáng doqdan gù nghut lhê.

4 Nungmoq gi, nga-nhûng é Yhumsîng Yesuq é myìng mai zup zing mù, ngá é i-myt gi, nungmoq eq rahá nghut nyi luí, nga-nhûng é Yhumsîng

Yesuq é a-tsam le, nungmoq eq rahá nghut nyi é hkûn,

<sup>5</sup> byù haú yuq lé, Tsadán é loq má ap byî pyám keq.\* Haû jáng, Yhumsing é buinyì má, yhâng é woi-nyí gi, hkyi yu é hui râ matú, yhâng é yubak gungsho gi, lhoq htên pyâm é hui râ nghut lhê.

<sup>6</sup> Nungmoq é nghutbun hkyô gi, ge é a nghut. Mún† ra tsuí zo gi, muk long gón lé wó lhoq daú nhang é lé, nungmoq a sé kó lú?

<sup>7</sup> Nungmoq gi, múnchi a bo é bang nghut nyî kô é eq rajung za, múnchi a bo é muk htung asik su wó dut kô sháng gaq, múnchi axau lé lhuí pyám keq. Hkâsu mù gâ le, nga-nhúng é Lhoqlhai Poí sauzo, Hkrisduq gi, hkungga nhong é hui bê nghut lhê.

<sup>8</sup> Haû mù luí, nga-nhúng gi, agè agaú hkyô eq hpuzo nhâng hkyô nghut é múnchi axau bo é dông a nghut é za, lhumzui hkyô eq tengmán hkyo é muk nghut é, múnchi a bo é muk èq, Poí haú lé kut nyî sháng.

<sup>9</sup> Ashop é dông gungsho zùm yap é bang eq hkâzûm kó nghû, ngò, nungmoq lé, ngá é laiká má kâ kat byi bê nghut lhê.

<sup>10</sup> Nghut kôlhang, mingkan shî eq sêng é, ashop é dông gungsho zùm yap é bang, myoqnoq é bang, mhaú zô é bang eq hparà noq é bang lé hkâzûm yap kó nghû é gi, a nghut. Haû su ru nghut le gi, mingkan htoq shî mai nungmoq htoq ló byuq ra kô râ nghut lhê.

---

\* **5:5** *Tsadán é loq má ap byî pyám keq gâ é gi, hpúng byù wui eq a zùm yap nhâng lo râ lé taí é nghut lhê.* † **5:6** *Mún gâ é gi, yubak mara lé taí nau é nghut lhê. Lhoqlhai Poí jé jáng, Israelaq byu pé gi, yhangmoq wó é múnchi banshoq lé lhuí pyám mù, múnchi a bo é muk saí kô é nghut lhê.*

<sup>11</sup> Nghut kôlhang, yhanggùng yhang gi, gumang ga kôle, ashop é dông gungsho zùm yap é, myoqnoq é, hparà noq é, lumù gansang é, î shuq wut é, mhaú zô é sù ó yuq eq le a ge zùm yap kô râ nghut lê nghû, ahkuî, ngò, nungmoq lé kê kat nau é nghut lê. Haù sù é byù eq gi, rahá lhang hkâzo kó.

<sup>12</sup> Haù noqkuq hpúng shinggan mâ é bang lé jéyáng râ gi, ngò eq hai sêng lê lú? Nghut kôlhang, hpúng ahkaù mâ é bang lé nungmoq jéyáng râ dut lê.

<sup>13</sup> Hpúng shinggan mâ é bang lé gi, Garai Gasang jéyáng râ nghut lê. Nghut kôlhang, "Haù agè agau é sù lé, nungmoq chyáng mai lhoq htoq pyám keq."✧ gâ tô ri.

## 6

### *Lumjng Bâng Hkaù Má Jéyáng Lhùm É Hkyô*

<sup>1</sup> Nungmoq mâ é rayuq yuq gi, gumang góyuq eq dang-rhâng lhùm tô é nghut jáng, haù hkyô lé jéyáng nhâng râ matú, haù sân-yúng bâng é hí má tái râ malaî, Garai a wó bâng é hí má wám tái râ lú?

<sup>2</sup> Haù sân-yúng bang gi, mingkan lé jéyáng râ nghut é hkyô lé, nungmoq a sé kó lú? Nungmoq gi, mingkan lé jéyáng râ bang nghut kôle nhing, tiq é mù pé lé wó jéyáng é bang a nghut kó lú?

<sup>3</sup> Nga-nhúng gi, maumâng pé lé jéyáng râ nghut é hkyô lé, nungmoq a sé kó lú? Haù mù, shí pyat mâ é hkyô pé lé, gè gè yhang wó jéyáng kô râ nghut lê ô!

---

✧ 5:13 Tarâ Pun 17:7



4 Haû mù luî, nungmoq gi, dang-rhâng lhûm é mù pé joq é nghut jáng, noqkuq hpúng má ahkyak a nghut é bang lé tarâ agyì kut nhâng kô râ lú?

5 Ngò, haû su nghû taì é gi, nungmoq lé hoq hpu nhâng râ matú nghut lê. Lumjìng bâng chyáng dang-rhâng lhûm é hkyô lé wó jéyáng râ hpaqchyì luq shoq bo é byù, nungmoq chyáng rayuq lhang a nyì dut kô râ lú?

6 Nghut kôlhâng, nungmoq gi, gumang yhangchang rayuq eq rayuq, a lumjìng bâng é hí má lhang rûng shok lhum akô nhung!

7 Nungmoq hkaû má mù jéyáng lhûm é hkyô joq é nghut jáng, nungmoq gi, sum lugù nghut bê. Góyuq èq shut le lhang rû ge lê a nghut kô lú? Mhaú zô é huì le lhang rû gè lê a nghut kô lú?

8 Nghut kôle, nungmoq yhang gi, mhaú zo kô é eq shut kô é nghut luî, haû gi, nungmoq é gumang wui lé kut é nghut lê.

9 Agè agaú é bang gi, Garai Gasâng é mingdán mâ é shimân jeju a myang hkam yù kó râ nghut é hkyô lé, nungmoq a sé kó lú? Hkâ-nâ nyì kó. Ashop é dông gungsho zùm yap é bang le, hparà noq é bang le, su-myi sulàng lú é bang le, shiwa hpó kut é bang le, yuqgè yhangchang nyì zô lhûm é mara kut shut é bang le,

10 hkau bang le, myoqnoq bang le, î shuq wut bang le, lumù gansang é bang le, mhaú zô é bang le, Garai Gasâng é mingdán mâ é shimân jeju lé myang hkam yù kô râ a nghut.

11 Nungmoq mâ é ra-am gi, haû su kut kô é bang nghut akô. Nghut kôlhâng, nungmoq gi, nga-nhûng é Garai Gasâng é Woi-nyí eq Yhumsîng

Yesuq Hkrisduq é myìng mai, mara hkyut san byî é, lhoq sân-yúng é eq chí sân pyám byî é hui bekô nghut ri.

*Ashop É Đông Gungsho Zùm Yap É Hkyô*

<sup>12</sup> "Jung hkgangmó kut râ ahkáng ngò wó lhê." Nghut kôlhang, jung hkgangmó gi, akyû byî é a nghut. "Jung hkgangmó kut râ ahkáng ngò wó lhê." Nghut kôlhang, haí jûng èq le ngo lé wó sing pyám râ a nghut.

<sup>13</sup> "Zoshuq gi, wamdaû é matú nghut mù, wamdau gi, zoshuq é matú nghut ri." ga nungmoq ra-am taí kó râ nghut lhê. Nghut kôlhang, Garai Gasang gi, haû í jûng é lé lhoq htên pyám râ nghut lhê. Gungdu gi, ashop é đông gungsho zùm yap hkyo é matú a nghut é za, haû Yhumsing é matú nghut mù, haû Yhumsing gi, gungdû é matú nghut ri.

<sup>14</sup> Garai Gasang gi, Yhâng é a-tsâm èq, haû Yhumsing lé, shi é mai lhoq dui toq yû bê nghut mù, nga-nhúng lé le lhoq dui toq yû râ nghut lhê.

<sup>15</sup> Nungmoq é gungdu pé gi, Hkrisduq é gungsho showui showang pé yhang nghut é lé, nungmoq a sé kô lú? Haû nghut le nhîng, Hkrisduq é gungsho showui showang pé lé yù mù, shiwa myhî pé eq rading ralhum za kut pyám nhâng kô râ lú? Hkâ-nhám le a ge dut nhâng!

<sup>16</sup> Shiwa myhî eq gungsho zum é sù gi, yhang eq gungsho ralhum za dut bê hkyô lé, nungmoq a sé kô lú? Hkâsu mù gâ le, "Yhangnhik gi, gungsho ralhum za dut kô râ nghut lhê."\* ga taí tô ri.

---

\* 6:16 Apûn 2:24

17 Nghut kôlhang, haû Yhumsîng eq rading ralhum za dut é sù gi, woi-nyí má Yhang eq ralhum za dut bekô nghut ri.

18 Ashop é dông gungsho zùm yap é hkyô lé koi pyám keq. Byù rayuq kut shut é gotû mara pé banshoq gi, yhâng é gungdu shinggan má nghut lhê; nghut kôlhang, ashop é dông gungsho zùm yap é hkyô kut shut é sù gi, yhumsing gùng lé mara shut é sù nghut ri.

19 Nungmoq é gungdu gi, Garai Gasâng chyáng mai nungmoq wó yû bê nghut é, nungmoq má lúng nyí é Chyoiyúng Woi-nyí é noqkuq yhûm nghut é lé, nungmoq a sé kô lúhú? Nungmoq gi, yhumsîng gùng lé sing é bang a nghut.

20 Hkâsu mù gâ le, nungmoq gi, ahpau ralhum byi mù wui hpyit tô é hui bê bang nghut akô. Haû mù luí, nungmoq é gungdú èq, Garai Gasang lé, hkunggâ é hkyô shit nyí keq.

## 7

### *Myî Yu É Eq Sêng É Hkyô*

1 Ahkuî, nungmoq kê kat é hkyô pé eq séng luí ga jang, yuqgè rayuq gi, myi a yu le gè ri.

2 Nghut kôlhang, ashop é dông gungsho zùm yap é hkyô gyai myô é yanmai, yuqgè hkangmó gi, yhumsing é myiwe wó râ lhê; myiwe hkangmó gi, yhumsing é yuqgè wó râ lhê.

3 Haû yhumsîng hpó gi, wò joq é eq rajung za, yhâng yhumsîng myhí eq zùm sháng gaq; haû dông za, yhumsîng myhí le, yhâng yhumsîng hpó eq zùm sháng gaq.

4 Haû yhumsîng myhî é gungdu gi, yhanggùng yhang za sêng é a nghut, yhang é yhumsîng hpó eq le sêng lhê. Haû eq rajung za, yhumsîng hpó é gungdu gi, yhanggùng yhang za sêng é a nghut, yhang é yhumsîng myhî eq le sêng lhê.

5 Nungmoq myit huî lhum luî, kyûdûng é má rago ap nóng râ ahkyíng ayoq za a nghut jáng gi, rayuq eq rayuq hkâhe lhum kó. Nungmoq yhumsing gùng lé a wó hkang é yanmai, Tsadán eq gunglaú é a huî kô sháng gaq, ahkyíng ayoq haû lai jáng, rahá dum zùm keq.

6 Ngò, haû su nghû taí é gi, hkunmó hkyô é dông a nghut, ahkáng byî kat é dông ru nghut lhê.

7 Byù banshoq bang gi, ngò su nyì râ lé ô nau ri. Nghut kôlhang, yuq hkangmó gi, ó le ô é chyunghuq lé Garai Gasâng chyáng mai wó bum akô nghut ri; rayuq gi, rajung chyunghuq, góyuq gi, gó jung chyunghuq wó bum akô.

8 Ahkuî, myiwe a yù lô é bang eq chuimó pé lé ngò taí kôlé, ngò su, haû dông jáng nyi pyám kô é nghut le, yhangmoq é matú ge é hkyô nghut ri.

9 Nghut kôlhang, yhumsing gùng lé a wó hkâng kô é nghut le gi, yhangmoq, myi yû myi ló râ lhê; hkâsu mù gâ le, myi su nyé luî ô nau nyì râ malaî, myi yu myi ló le je ge lhê.

10 Myi yû bê bang lé, ngò, hkunmó hkyó kôlé, shî gi, ngò dông hkyô é a nghut, Yhumsing chyáng mâ é ru nghut lhê: Yhumsîng myhî gi, yhang é yhumsîng hpó chyáng mai a ge gang râ nghut lhê.

11 Nghut kôlhang, yhang gâng é nghut jáng, myi a dum ló é za nyì râ lhê, haû a nghut jáng, yhang é yhumsîng hpó eq dum xoq yû râ lhê. Yhumsîng

hpó le, yhâng é yhumsîng myhí lé a ge kâng pyám râ nghut lhê.

<sup>12</sup> Góbang lé ngò shî su nghû taí kôlé, shî gi, Yhumsîng chyáng mâ é a nghut, ngò dông mai taí é ru nghut lhê. Gumang rayuq yuq gi, lumjîng sù a nghut é yhumsîng myhí wó é nghut le, myiwe haû, yhang eq rahá nyi nau é nghut jáng, yhang lé a ge kâng pyám râ nghut lhê.

<sup>13</sup> Myiwe rayuq gi, lumjîng sù a nghut é yhumsîng hpó wó é nghut le, yuqgè haû, yhang eq rahá nyi nau é nghut jáng, yhang eq a ge gang râ nghut lhê.

<sup>14</sup> Hkâsu mù gâ le, haû a lumjîng sù yhumsîng hpó gi, yhâng yhumsîng myhí dông mai lhoq sân-yúng é hui bê nghut mù, a lumjîng sù yhumsîng myhí le, lumjîng sù nghut é yhâng é yhumsîng hpó dông mai lhoq san lhoq yúng é hui bê nghut ri. Haû a nghut jáng, nungmoq é zo wuí gi, a sanséng dut kô râ nghut lhê; nghut kôlhang, yhangmoq gi, haû dông mai, chyoiyúng bekô nghut ri.

<sup>15</sup> Nghut kôlhang, haû a lumjîng sù gâng ló naû jáng gi, gâng ló sháng gaq. Lumjîng é yuqgè nghut nghut, myiwe nghut nghut, haû sù é hkyô pé má gi, hkûm zing tô é hkyô a joq é nghut lhê. Garai Gasang gi, nga-nhúng lé, nguínón shoq nyi sháng gaq ga ji yù bê nghut lhê.

<sup>16</sup> Yhumsîng myhí ê, náng é yhumsîng hpó lé wó hkyi yù râ nghû, hkâsu wó sé râ lú? Yhumsîng hpó ê, náng é yhumsîng myhí lé wó hkyi yù râ nghû, hkâsu wó sé râ lú?

<sup>17</sup> Hká dông nghut kôlhang, yuq hkanmó gi, Garai Gasang, yhang lé ji yu tô é hkûn, haû Yhumsîng mai yhang lé nyi nhang tô é dông asak

dui nyi râ lê. Haû gi, noqkuq hpúng pé banshoq má ngò tô to byî é tarâ nghut lê.

18 Byù rayuq gi, ji yu é huî é hkûn, ahpyo-kuq hpyit hkam yu to gù bê nghut jáng, ahpyo-kuq hpyit a hkâm sù dông a dut byuq sháng gaq. Byù rayuq gi, ji yu é huî é hkûn, ahpyo-kuq hpyit a hkam yu to shî é nghut jáng, ahpyo-kuq hpyit a hkam yù sháng gaq.

19 Ahpyo-kuq hpyit hkâm hkyô gi, haî ahkyak a nghut; ahpyo-kuq hpyit a hkâm hkyô gi, haî ahkyak a nghut. Garai Gasâng é hkunmó pé lé châng nyi é za sheq ahkyak nghut lê.

20 Yuq hkanmó gi, yhang lé Garai Gasâng èq ji yu é hkûn lê su xoq nyi nyi râ lê.

21 Nàng gi, ji yù huî é hkûn jùn dut nyi é lú? Haú hkyô lé hkâ-myit chiq. Nghut kôlhang, nàng gi, luthkyô wó yu é nghut jáng, haú dông nyi aq.

22 Hkâsu mù gâ le, haû Yhumsing èq ji yu é huî é hkûn, jùn dut nyi é sù gi, haû Yhumsing èq lhoq lhut yu é byù nghut bê. Haû eq rajung za, ji yu é huî é hkûn, luthkyô wó é sù gi, Hkrisduq é jùn nghut ri.

23 Nungmoq gi, Garai Gasâng èq ahpau byi mù wui hpyit yu é hui bê bang nghut akô. Haû mù, byu pé é jùn hkâdut kó.

24 Gumang wui ê, yuq hkanmó gi, yhumsing lé Garai Gasâng èq ji yu é huî to bê dông, Yhâng é hí má xoq nyi nyi râ lê.

25 Ahkuî, zomyi zorâm wui é hkyô taí kôlé. Haû Yhumsing chyáng mâ é hkunmó gi, ngò a wó; nghut kôlhang, Yhumsing é shogyo nhikmyîn é yanmai, lumgíng sù rayuq nghut nyi é dông, ngò, nungmoq lé hkyô shit râ nghut lê.

26 Ahkuî hui zô é wuîhke hkyo é yanmai, nungmoq gi, yhumsîng nyi to é su xoq nyi nyi le je ge ri nghû, ngò wó myit ri.

27 Nàng, myihâng bê a nghut lhi? Lhoq kang râ hkâda lo. Nàng, myi a háng shi a nghut lhi? Myi hkâhô lo.

28 Nghut kôlhang, nàng, myihâng é nghut le gi, mara a nghut. Zomyi gi, myi ló é nghut jáng, mara a nghut. Nghut kôlhang, myihâng é bang gi, shí pyat má wuîhke hkyô pé myo myo hui kó râ nghut mù, ngò, nungmoq lé haû mai hkyi yù nau ri.

29 Gumang wuî ê, ngò taí nau é lichyúm gi, ahkýng tot byuq bê nghut mù, ahkuî mai, myi wó é bang gi, a wó é bang dông nyi kó sháng gaq.\*

30 Yón ngaû huî é bang gi, a huî é bang su; gabú é bang gi, a gabú é bang su; sutzè lé wui yu é bang gi, sutzè a wó é bang su;

31 haû mingkan zè pé lé chung é bang gi, haú pé lé a myit tuî é bang su, nghut kó sháng gaq. Hkâsu mù gâ le, shî mingkân é ahkui lhê é azông isâm gi, laî ló nyi é nghut lhê.

32 Ngò gi, nungmoq lé a myit myo nhâng naù. Myi a yù shî é sù gi, haû Yhumsîng lé hkâsu wó gabú nhâng râ matú, haû Yhumsing é muzó lé myit chiq nyi ri.

33 Nghut kôlhang, myi yû bê sù gi, yhâng é yhumsîng myhí lé hkâsu wó gabú nhâng râ matú, mingkan shi é muzó eq séng luî myit chiq nyi ri.

34 Haû mù, yhâng shirong é myit gi, byo myín nyi ri. Myi a ló é myiwe nghut nghut, zomyi gyíng

---

\* 7:29 A wó é bang dông nyi kó sháng gaq gâ é gi, Garaî mù lé je myit zuq nyi sháng gâ naù é nghut lhê.

nghut nghut gi, yhang é gungdu eq woi-nyí má haû Yhumsîng lé rago wó ap nóng râ matú, Yhumsîng é muzó pé eq séng luí myit chiq nyi ri. Nghut kôlhang, myi ló bê myiwe gi, yhang é yhumsîng hpó lé hkâsu wó gabú nhâng râ matú, mingkan shi é muzó eq séng luí myit chiq nyi ri.

<sup>35</sup> Ngò, haû su nghû taí é gi, nungmoq é matú ge é hkyô nghut lhê; nungmoq lé tara eq zuí zing é a nghut é za, myit a byò lo shoq Yhumsîng lé wó ap nóng râ matú, jô é dông asak wó duí kô sháng gaq nghu é hkyô ru nghut lhê.

<sup>36</sup> Nghut kôlhang, rayuq yuq gi, yhang dúng tô é zomyi gyíng lé a htuk é dông kut nyi é su wó myit ngàm jáng, myiwe haû asak kô lo nyi mù, hâng yù râ dut bê nghû myit é nghut le gi, yhang ô nau é dông kut sháng gaq. Yhang mara kut é a nghut. Yhangnhik gi, hâng lhum râ lhê.

<sup>37</sup> Nghut kôlhang, yhang gi, haû hkyô lé yhang é myit mai wó lhoq zîm pyâm é nghut mù, yut yut ô naù hkyô é ahkaû má a nghut é za, yhumsîng ô naù é hkyô lé wó hkûm zing pyâm é sù nghut luí, haû zomyi gyíng lé a hâng yù râ matú wó myit hpyit bê sù nghut é nghut jáng, yhang gi, ge é hkyô kut bê nghut ri.

<sup>38</sup> Haû mù luí, zomyi gyíng haû lé hâng yu é sù gi, jô é hkyô kut bê nghut ri; nghut kôlhang, zomyi gyíng haû lé a hâng yu é sù gi, je ge é hkyô kut bê nghut ri.

<sup>39</sup> Myiwe rayuq gi, yhang é yhumsîng hpó rû dui nyi nyi, yhang eq xoq tô ashî nghut lhê. Nghut kôlhang, yhang é yhumsîng hpó shi byuq é nghut jáng, yhang gi, myi ló râ ahkáng dum wó bê nghut



lhê, nghut kôle, haú yuq gi, Yhumsîng eq sêng é sù dut râ lhê.

<sup>40</sup> Ngò jéyáng é dông ga jáng, myi a dum ló é wó nyi le gi, yhâng é matú je gabú hkyô dut râ nghut lhê. Ngò le, Garai Gasâng é Woi-nyí wó sù nghú wó myit ri.

## 8

### *Hparà Lhò Lé Tîng Byî É Zoshuq*

<sup>1</sup> Ahkuí, hparà lhò pé lé tîng byî é zoshuq hkyô: nga-nhúng banshoq bang gi, haú hkyô eq séng luí sê lhê. Sê é hkyô gi, nghutbun sê lhê; nghut kôlhang, chyitdap myit gi, lhoq kô myhang lhê.

<sup>2</sup> Byù rayuq yuq gi, rajung jung lé sé bûn é nghut le, yhang sé âng é lé lhang a sé shi nghut ri.

<sup>3</sup> Nghut kôlhang, Garai Gasang lé chyitdap é sù gi, Garai Gasâng eq sê é sù nghut ri.

<sup>4</sup> Haú mù luí, hparà lhò pé lé tîng byî é zoshuq lé zô é eq séng luí gi: hparà lhò gi, mingkan má haí lhang a nghut é hkyô lé le, Garai Gasang gi, Yhang rayuq mai lai luí gotû a nyi é lé le, nga-nhúng sê lhê.

<sup>5</sup> Hkâsu mù gâ le, mauhkûng htoq má nghut nghut, myigùng htoq má nghut nghut, byù ra-am mai hparà pé ga bang nyi mù, "hparà pé" myo myo eq "yhumsîng pé" myo myo nyi kôlhang

<sup>6</sup> nga-nhúng é matú gi, Íwa nghut é Garai Gasang rayuq za nyi é nghut mù, lunglhang gi, Yhang mai hpan é nghut luí, nga-nhúng gi, Yhâng é matú asak ðui nyi é nghut lhê. Yesuq Hkrisduq ngu é Yhumsîng rayuq za nyi é nghut mù, lunglhang gi,

Yhang dông mai hpan é nghut luí, nga-nhúng gi, Yhang dông mai asak dui nyi é nghut lhê.

<sup>7</sup> Nghut kôlhang, yuq hkangmó gi, haú hkyô lé sê gam hkoq yu é a nghut. Ra-am gi, ahkuí jé shoq hparà lhô pé má mán byuq kô é yanmai, haú sù é zoshuq lé yhangmoq zô é hkûn, hparà lhô lé tîng byî é zoshuq dông myit sôn yu akô. Yhangmoq myit sôn sê é hkyô wum nyhôm é yanmai, mara wó bún akô nghut ri.

<sup>8</sup> Nghut kôlhang, zoshuq gi, nga-nhúng lé, Garai Gasâng shut shuí chyâng e é a nghut. Nga-nhúng a zô é nghut le gi, je sôm byuq ló é a nghut, zô é nghut le gi, je ge lo é a nghut.

<sup>9</sup> Haú su ga kôlhang, nungmoq a htung a htê zô é hkyô gi, lumjîng myit wum nyhóm bâng é matú myit leqbat jowò a dut shoq sidiq keq.

<sup>10</sup> Hkâsu mù gâ le, sumsé hpaqchyî wó é bang nungmoq gi, hparà lho é noqkuq yhûm má zô nyi kô é lé, haú myit sôn sê é hkyô má wum nyhôm é sù rayuq yuq myang é nghut jáng, hparà lhô pé lé tîng byî é zoshuq lé, yhang wám zo râ lé wum byî é a dut kó râ lhú?

<sup>11</sup> Haú mù, Hkrisduq shî hkám byi bê nghut é, wum nyhôm é gumang hpó haú yuq gi, nungmoq é sumsé hpaqchyî eq lhoq htên pyâm é hui berá nghut lhê.

<sup>12</sup> Nungmoq gi, haú hkyô dông mai, nungmoq é gumang wui lé mara kut shut é eq, yhangmoq é myit sôn sê é hkyô wum nyhôm é lé nò nhang é hkûn, Hkrisduq lé mara kut shut é nghut bekô.

<sup>13</sup> Haú mù luí, ngò zô é gi, ngá é gumang hpó lé mara kut shut nhang é nghut jáng, yhang lé myit a

leqbat nhâng sháng gaq, ngò, hkâ-nhám le, sho lé a zo lo râ nghut lhê.

## 9

### *Lagyo Rayuq É Ahko Ahkáng*

<sup>1</sup> Ngò gi, lut sù a nghut lhú? Ngò gi, lagyo rayuq, a nghut lhú? Ngò gi, nga-nhông é Yhumsing Yesuq lé myang wú bê sù, a nghut lhú? Nungmoq gi, haú Yhumsing má, ngò zui saí é muzó é ashi pé chyat, a nghut kô lhú?

<sup>2</sup> Ngò gi, góbâng chyáng lagyo a nghut kôlhang, nungmoq chyáng gè gè nghut lhê! Hkâsu mù gâ le, nungmoq gi, haú Yhumsing má, ngò lagyo nghut é hkyô saksé dizik nghut bum akô.

<sup>3</sup> Ngá ahtoq má jéyáng bang lé, ngá gûng ngò taí hung kat kôlé.

<sup>4</sup> Ngamoq gi, zo râ shuq râ ahko ahkáng a wó é bang nghut lhê lhú?

<sup>5</sup> Gotû lagyo pé eq Yesuq é yhanggu yuqzô pé eq Kehpa kut é su, lumjینگ sù nghut é yhumsing myhí shuí chùng râ, ngamoq, ahko ahkáng a wó é nghut lhê lhú?

<sup>6</sup> Ngò eq Barnaba baú za, asak duì hkyo é matú mù zui ra râ lhú?

<sup>7</sup> Ó yuq wá, yhumsing zoshuq wùn luí, gyè mù wùn waq râ lhú? Ó yuq wá, tsibiyiq hkyâm saí mù, haú mâ é tsibiyiq shi a zo kut râ lhú? Ó yuq wá, sau rém mù, sau naú a shuq kut râ lhú?

<sup>8</sup> Ngò gi, shí hkyô pé lé xângzo hkyam đông za taí é nghut lhê lhú? Haú tarâ má le, rajung za taí tô lhê, a nghut lhú?

<sup>9</sup> Hkâsu mù gâ le, haû Mosheq é tarâ má, "Guq nâng nyi é no lé nhuttsung hkâ-tsûng to byi."✠ ga kê tô ri. Garai Gasang gi, no eq séng luí za chiq é nghut lhê lhú?

<sup>10</sup> Gè gè yhang, yhang gi, nga-nhûng é matú taí é a nghut kê lhú? Nghut lhê, haû gi, nga-nhûng é matú kê to byi é nghut lhê. Haî mù gâ le, yò hpuq sù, yò hpuq é eq, guq bat sù, guq bat é gi, kyô chôm shú yù râ lé myoqbyù luí, kut kê é nghut lhê.

<sup>11</sup> Ngamoq gi, nungmoq chyáng woi-nyí amyui sân kat bê nghut mù, nungmoq chyáng mâ é mingkan zè lé shú yu é nghut jáng, lûm myô é dut byuq bekô lhú?

<sup>12</sup> Góbang gi, nungmoq chyáng mai garúm é ahko ahkáng wô kê é nghut jáng, ngamoq gi, haû lé je wô râ lhê a nghut kô lhú?

Nghut kôhang, ngamoq gi, ahko ahkáng haû lé a yu é nghut lhê. Haû yù râ malaî, Hkrisduq é gabú danglù gi, hkûm zing pyâm é a hui râ matú sheq, jung hkangmó lé ngamoq hkam jân nyi lhê.

<sup>13</sup> Haû noqkuq yhûm má mù zuí é bang gi, yhangmoq é zoshuq lé haû noqkuq yhûm mai wô é hkyô eq, hkungga gyap má dojaú é bang gi, hkungga gyap má nhông byi é ra-am lé myàng zô é hkyô lé, nungmoq a sé kê lhú?

<sup>14</sup> Haû eq rajung za, gabú danglù hko kyô é bang gi, gabú danglù hkyô mai yhangmoq é asak baú râ lhê ga, haû Yhumsing hkunmó hkyô to bê nghut ri.

<sup>15</sup> Nghut kôhang, ngò gi, ahko ahkáng haû pé haî lé le a yu é nghut lhê. Nungmoq, ngo lé haû su lhom kut byi râ lé myoqbyù mù, ngò, shî hkyô lé

---

✠ 9:9 Tarâ Pun 25:4

kâ é a nghut. Hkâsu mù gâ le, ngò haû su gumrong é hkyô lé, rayuq yuq lhoq htên pyám byi râ htoq má, ngò shi byuq le lhang je ge ri.

<sup>16</sup> Nghut kôlhang, gabú danglù lé ngò hko kyô é hkûn, ngò gumrông jang a joq; hkâsu mù gâ le, haû gi, ngò a kut a ge é ngá wô nghut lhê. Haû gabú danglù lé ngò a hko kyô é nghut le gi, ngò dingnyé wó râ nghut lhê.

<sup>17</sup> Yhumsing nau é myit mai ngò hko é nghut jáng, shigyaú chyunghuq wó râ nghut lhê; yhumsing nau é myit mai a nghut jáng gi, ngo lé lùm luí ap tô é lé, agon za wùn waq nyi é dut râ nghut lhê.

<sup>18</sup> Haû mù luí, ngá é shigyaú chyunghuq gi, haí nghut lhê lú ga jang, haû gabú danglù lé hko kyô é hkûn, ngò gi, ahpau a yu é za wó ap nóng luí, gabú danglù hko kyo hkyô mâ é ngá é ahko ahkáng pé lé ngò a yu é amyat nghut lhê.

<sup>19</sup> Ngò gi, ó yuq é a-ô má le a nyi é za, lut sù nghut kôle, byù wó myô é myhó shuí lhing yù râ matú, ngá gûng ngò, yuq hkangmó é jùn kut nyi lhê.

<sup>20</sup> Ngò gi, Yudaq byu pé lé shuí lhing yù râ matú, Yudaq byu pé chyáng nghut nyi é hkûn, Yudaq byù rayuq đông dut nyi lhê. Ngò gi, tarâ hkaû má nyi sù a nghut kôlhang, tarâ hkaû mâ é bang lé shuí lhing yù râ matú, tarâ hkaû má nyi bâng chyáng nghut nyi é hkûn, tarâ hkaû mâ é byù rayuq đông dut nyi lhê.

<sup>21</sup> Ngò gi, tarâ a wó bang lé shuí lhing yù râ matú, tarâ a wó bâng chyáng nghut nyi é hkûn, tarâ a wó sù rayuq đông dut nyi lhê. Nghut kôlhang, gè gè ga jáng, Garai Gasâng é tarâ mai a lut htoq é za, Hkrisduq é tarâ hkaû má nyi sù nghut lhê.

<sup>22</sup> Ngò gi, wum nyhóm bang lé shuí lhing yù râ

matú, wum nyhóm bâng chyáng nghut nyi é hkûn, wum nyhóm sù rayuq đông dut nyi lhê. Ngò gi, wó dut é hkyô đông mai byù ra-am lé wó hkyi sháng gaq nghû, byù lunglhang bâng chyáng, byù ajà jà đông nyi nyi lhê.

<sup>23</sup> Ngò gi, gabú danglù mai wó é shimân jeju pé lé wó chôm hkam yù sháng gaq nghû, gabú danglù é yanmai haú pé banshoq lé kut é nghut lhê.

<sup>24</sup> Din shingjóng poî má dìn râ bang banshoq dìn kôlhang, rayuq za shigyaú chyunghuq wó é hkyô lé, nungmoq a sé kô lú? Chyunghuq wó râ matú dìn keq.

<sup>25</sup> Sup poî má shingjóng lhûm é bang yuq hkangmó gi, yhumsing gùng yhumsing tarâ htan é đông lhoq mhân yù râ lhê. Yhangmoq gi, gîng nyi râ a nghut é janmaú wó râ matú, haú su kut é nghut akô; nghut kôlhang, nga-nhúng gi, ahtum abyuq gîngtîng nyi râ nghut é janmaú wó râ matú shikut é nghut lhê.

<sup>26</sup> Haú mù luí, ngò gi, jum dîn din é byù rayuq su dìn é sù a nghut. Ngò gi, lai lé bat é byù rayuq su, akôm má bat é sù le a nghut.

<sup>27</sup> Ngò gi, góbâng chyáng mungdang hko é htâng má, ngá gùng ngò, shigyaú chyunghuq eq a gîngdán sù a dut sháng gaq nghû, ngá gùng lé gyai yhang lhoq mhân yù mù, ngá gung lé jùn kut yu nyi lhê.

## 10

### *Israelaq Pé É Labaú Mai Sidiq Byi É Hkyô*

<sup>1</sup> Gumang wuì ê, ngò gi, dut lai lo é hkyô lé, nungmoq lé a sé a dut nhâng nau é nghut lhê; hí

hkûn, nga-nhûng é îchýí îwa pé banshoq bang gi, mhutdûm ô má nyí mù, Nhông Nè mai wó laí byit kô é nghut lê.\*

<sup>2</sup> Yhangmoq banshoq bang gi, mhutdûm eq Nhông Nè má, Mosheq é chángzô pé dông baptisma hkam yu é bang chyat nghut bekô.

<sup>3</sup> Yhangmoq banshoq bang gi, rajung zâ é woi-nyí zang zo kô é eq,

<sup>4</sup> rajung zâ é woi-nyí wui shuq kô é nghut lê; hkâsu mù gâ le, yhangmoq eq rahá nghut nyi é woi-nyí eq sêng é luqbum mó mai, yhangmoq shuq kô é nghut lê; luqbum mó haû gi, Hkrisduq nghut bê.

<sup>5</sup> Nghut kôlhang, yhangmoq myo hpyang lé, Garai Gasang a nau é nghut mù, yhangmoq é gùng sôm lé yoso pé má myhîn so san kut pyâm é hui bekô nghut ri.

<sup>6</sup> Haú hkyô pé dut htoq é gi, agè ashop hkyô má yhangmoq myit tuí bùm é su, nga-nhúng a myit tuí nyí râ matú nga-nhûng é azông dut bê nghut ri.

<sup>7</sup> "Byu pé gi, zùng mù, zo luí shuq luí, a lumjîng bang kut é dông, toq mù, ye bum akô."✧ ga kê tô é eq rajung za, yhangmoq mâ é ra-am hparà noq é bang dut byuq é su, nungmoq hkâdut kó.

<sup>8</sup> Yhangmoq mâ é ra-am gi, ashop é dông gungsho zùm yap é hkyô shut kômù, ra-nyí má za í mûn sum hkyîng yuq shi byuq é su, ashop é dông gungsho zùm yap é hkyô le, nga-nhúng gi, a ge kut shut râ nghut lê.

---

\* **10:1** Bun zo ralhum mai raxê lhum gi, Htoq Ló Laiká má bo é Mosheq htâng cháng bâng é hkyô lé kê tô é nghut lê. ✧ **10:7** Htoq Ló 32:6

<sup>9</sup> Yhangmoq mâ é ra-am gi, haû Yhumsîng lé chyâm luî, lhangmuì pê èq hte sat é huì bùm kô é su, haû Yhumsîng lé, nga-nhúng gi, a ge chyâm râ nghut lhê.

<sup>10</sup> Yhangmoq mâ é ra-am gi, nhutluq shô-myo kôluî, lhoq htên é maumâng èq sat pyâm é hui kô é su, nungmoq gi, nhutluq shô-myo hkâkut kô.

<sup>11</sup> Yhangmoq chyáng wú yû râ azông dông haú pé dut htoq luî, ló htáng râ ipyat pé má nyi âng to bang nga-nhúng é matú sidiq byi râ dông kê to bê nghut ri.

<sup>12</sup> Haû mù luî, nungmoq gi, yap gîng nyi bê su ngàm kô é nghut jáng, a leqbat râ matú sidiq nyi keq!

<sup>13</sup> Byu chyáng htoq sê é gunglaú hkyô za nungmoq hui râ nghut lhê. Garai Gasang gi, lhumzui sù nghut lhê mù, nungmoq a wó jân é gunglaú hkyô lé hui nhâng râ a nghut. Nghut kôhang, nungmoq gunglaú huì é hkûn, Yhang gi, haû lé nungmoq wó jan râ matú, hkyô htong byi râ nghut lhê.

### *Hparà Lhô Noq Hkyô Lé Koi Pyám Râ Hkyô*

<sup>14</sup> Haû mù luî, ngò chyitdap é luzúm wui ê, hparà lâ noq hkyô lé koi pyám keq.

<sup>15</sup> Nhik gying bang lé ngò taì lhê, ngò haì taì nyi é hkyô lé nungmoq gùng myit sôn yù keq.

<sup>16</sup> Nga-nhúng, jeju bûn nyi é jeju góm lé shuq é hkûn, Hkrisduq é sui má chôm zùm bê a nghut kó lhú? Nga-nhúng, myhik hpê é muk lé zô é hkûn, Hkrisduq é gungdu má chôm zùm bê a nghut kô lhú?

<sup>17</sup> Haì mù gâ le, muk htung ralhum za nghut mù, nga-nhúng gi, myo myo nghut kôle ragùng za nghut



nyi lhê. Hkâsu mù gâ le, nga-nhúng banshoq bang gi, haû rahtung zâ é muk lé chôm gàm zô é bang chyat nghut lhê.

<sup>18</sup> Israelaq byu pê é hkyô lé myit wú keq. Haû hkungga lé zô é bang gi, hkungga gyap má chôm lom é bang nghut lhê, a nghut kó lú?

<sup>19</sup> Hparà lhô, a nghut jáng, hparà lhô lé tîng byî é hkungga gi, rajung jung nghut lhê nghû, ngò taî é lú?

<sup>20</sup> Haû su taî é a nghut, a lumjîng bâng é hkungga gi, Garai Gasang lé nhông byî é a nghut, nat gâng pé lé tîng byî é ru nghut lhê. Ngò gi, nungmoq, nat gâng pé eq chôm zum nyi bang dut râ lé a ô nau é nghut lhê.

<sup>21</sup> Nungmoq gi, haû Yhumsing é góm lé le, nat gâng pê é góm lé le, ge shuq râ a nghut; nungmoq gi, haû Yhumsing é zangbó má le, nat gâng pê é zangbó má le, rahá ge bo lòm râ a nghut.

<sup>22</sup> Nga-nhúng gi, haû Yhumsîng lé manôn nhâng nau é bang dut râ a nghut kô lú? Nga-nhúng gi, Yhâng htoq je wúm bo é bang nghut lhê lú?

### *Lumjîng Su É Luthkyô*

<sup>23</sup> "Jung hkanmó kut râ ahkáng wó lhê." nghut kôlhang, jung hkanmó gi, akyû wó é a nghut. "Jung hkanmó kut râ ahkáng wó lhê." nghut kôlhang, jung hkanmó gi, byù lé wó kô làm nhang é a nghut.†

<sup>24</sup> Ó yuq le, yhumsing é gè hkyo matú ho é a nghut é za, góbâng é gè hkyo é matú hô râ dut lhê.

† **10:23** Bun zo 23 mã é dangngho gi, Korinhtuq byu pé lhaq taî é dang nghut lhê.

25 Sho ûng gai má ûng é haî lé lé, úng-âng é myit èq a myî gôn é za zo keq.

26 Hkâsu mù gà le, "Myidàm htoq eq haú má joq é jung hkangmó gi, Yhumsing é chyat nghut lhê."✧  
gâ tô ri.

27 A lumjîng bang ra-am, nungmoq lé zang zo jì mù, nungmoq ê nau é nghut jáng, úng-âng é myit èq a myî gôn é za, nungmoq hí má to byî é gû lé zo keq.

28 Nghut kôlhang, rayuq yuq, nungmoq lé, "Shî gi, hparà lhô lé tîng byi bê nghut lhê." ga taî kyô é nghut jáng, nungmoq lé taî kyo su é yanmai le, myit úng-âng é yanmai le, haú lé hkâzo kó.

29 Úng-âng é myit haú gi, nungmoq é a nghut, góyuq é úng-âng é myit lé taí nau é ru nghut lhê. Ngá é luthkyô lé, haî mù góyuq é úng-âng é myit èq jéyáng é huî nhang lhê lhú?

30 Ngò jeju bûn é myit mai bo zo bo shuq yu é nghut jáng, Garai Gasang lé jeju hkya-on bê nghut é zoshuq hau é yanmai, haî mù lumu pyâm é ngò hui râ lhú?

31 Haú mù luî, nungmoq zo kôlhang, shuq kôlhang, haî kut kôlhang, Garai Gasâng é hpungwup shîngkâng é matú chyat kut keq.

32 Ngò gi, yuq hkangmó lé, hkyô hkangmó má shikut luî myit ngón nhang é eq rajung za, nungmoq gi, Yudaq byu pé lé nghut nghut, Grik byu pé lé nghut nghut, Garai Gasâng é noqkuq hpúng mâ é byù lé nghut nghut, ó yuq lé le myit hkâleqbat nhâng kó.

---

✧ 10:26 Hkya-on 24:1

<sup>33</sup> Hkâsu mù gâ le, ngò gi, yhangmoq hkyi yu é wó hui kó sháng gaq nghũ, ngá é gè hkyô ho é a nghut é za, myo myô é matú gè hkyô ho nyi é ru nghut lhê.

## 11

<sup>1</sup> Ngò gi, Hkrisduq é alik châng é su, nungmoq gi, ngá é alik cháng keq.

### *Noqkuq É Má Htap Htuk Râ Hkyô*

<sup>2</sup> Nungmoq gi, hkyô hkangmó má ngo lé bûn nyi kô é yanmai le, nungmoq lé ngò hai byi bê mhoqshit hkyô pé lé myhik zing nyi kô é yanmai le, ngò, nungmoq lé hkya-ôn lhê.

<sup>3</sup> Ahkuî, ngò, nungmoq lé sê hkyâng nhâng nau é hkyô gi: yuqgè hkangmó é ulhum gi, Hkrisduq nghut ri; myiwe hkangmó é ulhum gi, yuqgè nghut ri; Hkrisduq é ulhum kúm gi, Garai Gasang nghut ri.

<sup>4</sup> Yuqgè hkangmó gi, kyûdûng le nghut nghut, myiqhtoi htoî le nghut nghut, yhâng é ulhum lé nghop tô é nghut jáng, yhâng é ulhûm é aróng lé lhoq hpoî pyâm é nghut bê.

<sup>5</sup> Myiwe hkangmó gi, kyûdûng le nghut nghut, myiqhtoi htoî le nghut nghut, yhâng é ulhum lé a nghop tô é nghut jáng, yhâng é ulhûm é aróng lé lhoq hpoî pyâm é nghut bê. Haû gi, yhâng é ulhum lé wuq pyâm é eq rajung za nghut ri.

<sup>6</sup> Myiwe rayuq gi, yhâng é ulhum lé a nghop pyâm é nghut jáng, yhâng é xâm lé nyhâm pyâm ra râ nghut lhê. Nghut kôlhang, xâm nyhâm pyâm é nghut nghut, xâm wuq pyâm é nghut nghut, myiwe rayuq é matú aróng hpoî lhê nghut jáng,

yhang gi, yhâng é ulhum lé nghop to ra râ nghut lhê.

<sup>7</sup> Yuqgè gi, Garai Gasâng é azòng isâm eq hpungwup shing kang nghut é yanmai, yhâng é ulhum lé a nghop râ é nghut lhê. Myiwe kúm gi, yuqge é hpungwup shing kang nghut ri.

<sup>8</sup> Hkâsu mù gâ le, a-nham sâng-hi má, yuqgè gi, myiwe mai lo é a nghut, myiwe sheq yuqgè mai lo é ru nghut lhê.✧

<sup>9</sup> Hau htoq agó, yuqgè lé gi, myiwê é matú hpan tô é a nghut, myiwe lé sheq, yuqge é matú hpan tô é ru nghut lhê.

<sup>10</sup> Haû nghut é yanmai le, maumang lagyo pê é yanmai le, myiwe gi, ahko ahkáng kumlhá đông yhâng é ulhum lé nghop râ dut lhê.

<sup>11</sup> Nghut kôlhang, haû Yhumsing hí má, myiwe gi, yuqgè lé nghehkau é su, yuqgè le, myiwe lé nghehkau é nghut lhê.

<sup>12</sup> Hkâsu mù gâ le, myiwe gi, yuqgè mai lo é su, yuqgè le, myiwe mai hku lé é nghut lhê. Nghut kôlhang, jung hkangmó gi, Garai Gasang mai lo é nghut lhê.

<sup>13</sup> Myiwe rayuq, ulhum a nghop é za Garai Gasang lé kyûdùng é gi, htuk kô râ lú? Nungmoq, yhumsing gung é matú doqdân yù keq.

<sup>14</sup> Yuqgè xâm hîng tô é nghut jáng, yhâng é matú aróng hpoî é hkyô dut é nghut kôle,

<sup>15</sup> myiwe xâm hîng tô é nghut jáng, yhâng é matú hpungwup shing kang nghut é hkyô lé, htúnglí éq nungmoq lé mhoqshít lhê, a nghut kô lú? Hkâsu mù gâ le, xâm hîng tô é gi, nghop râ zè đông yhang lé byî tô é nghut lhê.

---

✧ 11:8 Apûn 2:21-23

16 Rayuq yuq, haú hkyô lé taí dang-rháng nau é nghut jáng, ngamoq chyáng le, Garai Gasâng é noqkuq hpúng pê chyáng le, gotû htungli a joq é nghut lhê.

### *Yhumsing É Myinzang*

17 Nungmoq é zuphpong pé gi, gè hkyô kut râ htoq má akyû a bo é hkyô je kut kô é yanmai, a-ô má hkyô shit tô é pé má, ngò, nungmoq lé hkya-ôn é a nghut.

18 Sâng-hi má, noqkuq hpúng ralhum dông nungmoq zup zîng é hkûn, nungmoq hkaû má gam hkoq hkyô joq é lé wó gyô é nghut luí, têng é le bò râ nghû, ngò lumjîng lhê.

19 Ô pé gi, Garai Gasang o é hkyam shut nghut é lé wó shit râ matú, nungmoq ahkaû má gam hkoq lhum hkyô joq râ dut lhê.

20 Nungmoq rahá zup zing kô é hkûn, nungmoq gi, haú Yhumsing é myinzang zô é a nghut kó.

21 Hkâsu mù gâ le, nungmoq zô é hkûn, góyuq lé le a lánng é za, ó le ó hí yù zô akô. Haú mù, rayuq gi, zo mut huí nyì, góyuq gi, shuq wut to dut akô nghut ri.

22 Nungmoq gi, zo jang shuq jang yhûm a wó bang nghut akô lhú? Garai Gasâng é noqkuq hpúng lé wú tiq pyám kô é eq, a wó bang lé hoq hpu nhâng kô é, nghut akô lhú? Nungmoq lé ngò hkâsu nghû taí kó râ lhú? Haú pê é yanmai, ngò, nungmoq lé hkya-on râ lhú? Ratsuí lháng a wó dut!

23 Hkâsu mù gâ le, haú Yhumsing chyáng mai ngò wó hap yu é gû lé, nungmoq lé hai byi bê

nghut lhê: Haû Yhumsîng Yesuq gi, Yhang lé ap pyám huî é myìn má, muk lé yù mù,

<sup>24</sup> jeju hkya-ôn é htâng má, haû lé myhik hpé mù, taî é gi, "Shî gi, nungmoq é matú Ngá é gungsho nghut lhê; Ngo lé bûn nyî râ matú, shî su kut nyî keq." gâ ri.

<sup>25</sup> Haû eq rajung za, myinzang bàn zô é htâng má, Yhang gi, góm lé le yù mù, "Góm shî gi, Ngá é sui mâ é dangshikaq asik nghut lhê; hkâ-nhám le, nungmoq shî shuq é hkûn, Ngo lé bûn nyî râ matú shî su kut keq." gâ taî ri.

<sup>26</sup> Hkâsu mù gâ le, nungmoq gi, muk shî lé zo luî, góm shî lé shuq é hkangmó, haû Yhumsîng shî hkâm é hkyô lé, Yhang jé lé shoq, shit kyô nyî râ lhê.

<sup>27</sup> Haû mù luî, ó yuq nghut kôle, a gingdán é dông Yhumsing é muk haû lé zo mù, góm haû lé shuq é nghut jáng, haû Yhumsing é gungdu eq sui lé shut é mara wó bê nghut lhê.

<sup>28</sup> Haû mù, ó yuq le, muk zo góm shuq râ hí má, yhumsing gùng yhumsîng jep wú ra râ nghut lhê.

<sup>29</sup> Hkâsu mù gâ le, ó yuq nghut kôle, haû Yhumsing é gungdu eq sêng é hkyô lé a sê gyô é za muk zo góm shuq é nghut jáng, yhanggùng yhang mara zô bô shuq bo yu é nghut lhê.

<sup>30</sup> Haû nghut é yanmai, nungmoq mâ é byù myo myo gi, wum nyhôm é, nòhpyo huî é nghut bum akô. Ra-am gi, shi ló byuq bekô nghut ri.

<sup>31</sup> Nghut kôlhang, nga-nhúng gi, yhumsing gùng yhumsîng hí sôn sê yu é nghut jáng tarâ jéyáng é hui râ a nghut.

<sup>32</sup> Nga-nhúng gi, mingkan eq rahá, mara byî é a

hui zo sháng gaq ga, nga-nhúng lé haû Yhumsing èq jéyáng é hkûn, nga-nhúng gi, mhoqshit é huî nyî gù bê nghut lhê.

<sup>33</sup> Haû mù luî, ngá é gumang wuî ê, nungmoq gi, zo râ nghû rahá zup zîng é hkûn, rayuq eq rayuq láng lhum keq.

<sup>34</sup> Nungmoq rahá zup zîng é hkûn, jéyáng é a hui zo kó sháng gaq, rayuq yuq zòmút é nghut jáng, yhûm má zô chûng râ lhê.

Gotû myit tô é hkyô pé gi, ngò jé lé é hkûn sheq shit kyo râ nghut lhê.

## 12

### *Woi-nyî Hkyô Eq Sêng É Chyunghuq Pé*

<sup>1</sup> Gumang wuî ê, woi-nyî hkyô eq sêng é chyunghuq pé lé, nungmoq a sê gyo râ lé ngò a ô nau é nghut lhê.

<sup>2</sup> Nungmoq gi, a lumjîng bang nghut nyî kô é hkûn lé, dang a nyo é hparâ lhô noq râ matú hkyô shuí nghoq é hui kô é hkyô lé, nungmoq sê lhê.

<sup>3</sup> Haû mù luî, "Yesuq gi, nhîng pyâm é hui sháng gaq." ga, Garai Gasâng é Woi-nyî mai taî é byù ó yuq le a nyi é eq, haû Chyoiyúng Woi-nyî mai za a nghut jáng, "Yesuq gi, Yhumsîng nghut lhê." ga, ó yuq le a wó taî é nghut lhê nghû, ngò, nungmoq lé taî kyô é nghut lhê.

<sup>4</sup> Woi-nyî hkyô eq sêng é chyunghuq ajung jung joq lhê; nghut kôlhang, Chyoiyúng Woi-nyî mai chyat nghut lhê.

<sup>5</sup> Dojaú é hkyô ajung jung joq lhê; nghut kôlhang, Yhumsîng rayuq lé za dojaú é nghut lhê.

<sup>6</sup> Zui saî é hkyô ajung jung joq lhê, nghut kôlhang, Garai Gasang yhang za, byù lhunglhang bang má, haú pé banshoq lé kut é nghut lhê.

<sup>7</sup> Woi-nyí é hpông shit hkyô gi, byù pê é gè hkyô matú, yuq hkanmó lé byi bê nghut ri.

<sup>8</sup> Rayuq lé gi, Woi-nyí haú mai, hpaqchyî byéng-yá byíng é danglù byí é nghut ri; góyuq lé gi, Woi-nyí hau èq za, sumsé hpaqchyî byíng é danglù byí é nghut ri;

<sup>9</sup> góyuq lé gi, Woi-nyí hau èq, lumjín myit byí é nghut ri; dum góyuq lé gi, Woi-nyí hau èq, nò lhoq ge é chyunghuq byí é nghut ri;

<sup>10</sup> dum, góyuq lé gi, hpungwup a-tsam pé; dum, góyuq lé gi, myiqhtoi htoî é ahkáng; dum, góyuq le gi, woi-nyí pé lé sê gam hkoq é ahkáng; dum, góyuq lé gi, laklaí dang ahú hú ge taí é ahkáng; dum, góyuq lé gi, dang haú pê é lichyúm taí sân kyô é ahkáng, byí é nghut ri.

<sup>11</sup> Chyunghuq haú pé banshoq gi, Woi-nyí hau èq za kut é loqmú chyat nghut mù, Yhang myit hpyit é dông yuq hkanmó lé haú pé tsing gam byí é nghut ri.

### *Gungbun Myo Kôlhang, Ra Gùng Za*

<sup>12</sup> Gungdu gi, gungsho showui showang pé myo myo lé pong tô é nghut kôlhang, ragùng za nghut ri; gungsho showui showang pé banshoq myo myo nghut kôlhang, gungdu ra gùng za dut tô é nghut ri. Haú eq rajung za, Hkrisduq eq le haú dông nghut ri.

<sup>13</sup> Hkâsu mù gâ le, nga-nhúng banshoq bang gi, Yudaq byù nghut nghut, Grik byù nghut nghut, jùn nghut nghut, lut bang nghut nghut, gungdu ra



lhum za dut râ matú, Woi-nyí rayuq mai za wui-myhup hkâm yù bê nghut luí, Woi-nyí rayuq lé za chô m shuq yù bê bang nghut lhê.

<sup>14</sup> Haû gungdu gi, gungsho showui showang ra bun lé za kut tô é a nghut é za, myo myo lé pong tô é nghut lhê.

<sup>15</sup> Haû hkyî gi, "Ngò, loq a nghut é yanmai, gungdu eq a sêng é nghut lhê." gâ é nghut jáng, hau é yanmai, gungdu eq a séng wó dut é a nghut.

<sup>16</sup> Dum, haû nohkyap gi, "Ngò, myoqjí a nghut é yanmai, gungdu eq a sêng é nghut lhê." gâ é nghut jáng, hau é yanmai, gungdu eq a séng wó dut é a nghut.

<sup>17</sup> Ragùng dû é gi, myoqjí za nghut é nghut jáng, gyô é hkyô gi, hkâmá nghut râ lhú? Ragùng du é gi, nohkyap za nghut é nghut jáng, shôm nam é hkyô gi, hkâmá nghut râ lhú?

<sup>18</sup> Nghut kô nhang, Garai Gasang gi, gungsho showui showang hkanmó lé, Yhang dut nhâng nau é eq rajung za, gungdu má kut to bê nghut ri.

<sup>19</sup> Gungsho showui showang gi, ra bun za nghut é nghut jáng, gungdu gi, hkâmá nghut râ lhú?

<sup>20</sup> Hkyak ga jang, gungsho showui showang pé myo kô nhang, gungdu gi, ragùng za nghut ri.

<sup>21</sup> Haû myoqjí gi, loq lé, "Ngò, nang lé a ra!" nghû a ge taí. Haû ulhum gi, hkyî lé, "Ngò, nang lé a ra!" nghû a ge taí.

<sup>22</sup> Haû za a nghut, gungdu mâ é gungsho showui showang pé má wum je nyhôm é su dut é pé le, a bò a ge é chyat nghut lhê.

<sup>23</sup> Hau htoq agó, hpau a lûm tap râ su myit ngam é gungsho showui showang pé lé, nga-nhúng je

hpautap râ lâ. Haû a shit é jung gungsho pé lé, nga-nhúng hpautap é dông rago nghop râ lâ.

<sup>24</sup> Nga-nhúng é wó shit é gungsho pé kúm gi, haú hkyô a ra nghut ri. Nghut kôlhang, Garai Gasang gi, gungdû é gungsho showui showang pé lé pong to mù, aróng nyhum é lé, je riyhang aróng byi bê nghut ri.

<sup>25</sup> Haû mù, gungdu má gamhkuí lhùm é hkyô a bo é za, gungsho showui showang pé ralhú eq ralhú, rajung za kut wó myit tê byi lhú kó râ nghut lâ.

<sup>26</sup> Haû gungsho showui showang ralhú jam-jau huí é nghut jáng, lhú hkgámó bo jamjau râ nghut lâ. Ralhú hpautap huí é nghut jáng, lhú hkgámó bo gabú é nghut lâ.

<sup>27</sup> Ahkuí, nungmoq gi, Hkrisduq é gungdu nghut kôluí, nungmoq yuq hkgámó gi, haû é gungsho showui showang pé nghut akô.

<sup>28</sup> Garai Gasang gi, noqkuq hpúng má, sâng-hi lé, lagyô pé, í lhú nghú râ má, myiqhtoí pé, sùm lhú nghú râ má, mhoqshit bang, hau htâng má, laklaí kumlhá pé kut râ bang, nò wó lhoq gê râ chyunghuq wó é bang lé le, góbang lé wó garúm é bang, shuî-u râ chyunghuq wó é bang, laklaí dang ahú hú ge taí é bang lé, masat to bê nghut ri.

<sup>29</sup> Banshoq bang gi, lagyô pé nghut lâ lhú? Banshoq bang gi, myiqhtoí pé nghut lâ lhú? Banshoq bang gi, mhoqshit bang nghut lâ lhú? Banshoq bang gi, laklaí kumlhá kut akô lhú?

<sup>30</sup> Banshoq bang gi, nò lhoq ge é chyunghuq wó é nghut lâ lhú? Banshoq bang gi, laklaí dang ahú hú ge taí lâ lhú? Banshoq bang gi, dang haú pé é

lichyúm ge taí sâh kyô lhê lhú?

<sup>31</sup> Nghut kôhng, nungmoq gi, je gyaú é chyunghuq lé gyai yhang ô nau nyi keq.

### *Chyitdap Myit*

Hau htoq agó, ahkuí, ngò, nungmoq lé, je gyaú dik é hkyô ralhum shit kôlé.

## 13

<sup>1</sup> Ngò gi, byu pé é eq maumang lagyô pé é myíng pé lé sê taí é nghut kôhng, chyitdap myit a bo é nghut jáng, myíng hung htê bo é ut eq mying tui htê bo é chapchéng su za dut byuq râ nghut lhê.

<sup>2</sup> Ngò gi, myiqhtoi htoí é chyunghuq, zaú tô é hkyô pé banshoq lé sê gyô é nyan, sumsé hpaqchyí banshoq lé wó é eq, bùm pé lé wó htot nhang é lumjíng myit bo é nghut kôhng, chyitdap myit a bo é nghut jáng, ngò haí a nghut sù dut berâ nghut lhê.

<sup>3</sup> Ngò gi, wó é sutzè banshoq myùng bang lé byí pyâm é eq, ngá é gungdu lé nyhê pyám râ matú ap pyâm é nghut kôhng, chyitdap myit a bo é nghut le gi, hai akyú a bò nghut ri.

<sup>4</sup> Chyitdap myit gi, myit hing lhê, nú-nhâm lhê. Chyitdap myit gi, a manôn, gyáng dang a taí, a nghutbùn é nghut lhê.

<sup>5</sup> Chyitdap myit gi, hpau a dap é hkyô a kut, yhumsing é akyú baú za a hô, lui za nhikjum a yo, shut é mara a matsíng é nghut lhê.

<sup>6</sup> Chyitdap myit gi, agè ashop é má a gabú é za, haú tengmán hkyô má gabú nyi ri.

<sup>7</sup> Chyitdap myit gi, hkâ-nhám le wú magum ri, hkâ-nhám le lumhkau ri, hkâ-nhám le myit myoqbyu ri, hkâ-nhám le hkam jân ri.

<sup>8</sup> Chyitdap myit gi, hkâ-nhám le htûm byuq é a nghut. Myiqhtoi htoî é hkyô pé gi, byuq byuq râ nghut lhê; laklaí dang ahú hú ge taí é hkyô gi, zim byuq râ nghut lhê; sumsé hpaqchyí hkyô gi, laí ló byuq râ nghut lhê.

<sup>9</sup> Hkâsu mù gâ le, nga-nhúng sê é gi, ra-am rahtâng ru nghut lhê. Nga-nhúng myiqhtoi htoî é gi, ra-am rahtâng ru nghut lhê.

<sup>10</sup> Nghut kôlhang, gumjup hkyô jé lé é hkûn, a gumjup hkyô gi, byuq byuq râ nghut lhê.

<sup>11</sup> Ngò, zoshâng nghut ashî hkûn gi, zoshâng dông dang taí, zoshâng dông myit, zoshâng dông myit sôn wú é nghut lhê. Ngò, suwún nghut jáng gi, zoshâng nyì yap hkyô pé lé tô pyám bê nghut lhê.

<sup>12</sup> Ahkuî, nga-nhúng gi, myoqjâm hkaû mâ é rago a sân é wupzo lé za myàng é nghut lhê; nghut kôlhang, htâng má, myoqdong hkyûm wó myâng râ nghut lhê. Ahkuî, ngò gi, ra-am rahtâng za sê é ru nghut lhê; nghut kôlhang, Garai Gasang gi, ngo lé gumjup shoq sê é su, ngò le, htâng má, gumjup shoq sé râ nghut lhê.

<sup>13</sup> Ahkuî, lumjíng myit, myit myoqbyù hkyô, chyitdap myit shi sûm lhum myit tô ri. Nghut kôlhang, haú pé mâ é kô dik é gi, chyitdap myit nghut ri.

## 14

*Myiqhtoi Htoi É Chyunghuq Pé Eq Laklaí Dang  
Nyo É Chyunghuq Pé*

<sup>1</sup> Chyitdap hkyô má le cháng mù, woi-nyí hkyô eq sêng é chyunghuq lé le gyaí yhang myit o nyí keq. Myiqhtoi htoí é chyunghuq lé je riyhang myit o nyí keq.

<sup>2</sup> Hkâsu mù gâ le, laklaí dang ahú hú nyo é sù ó yuq le, byù lé nyo é a nghut é za Garai Gasang lé nyo é ru nghut lhê. Yhang lé ó yuq eq le a sê gyo byi, zaú tô é hkyô pé lé haú Woi-nyí eq nyo htoq é nghut ri.

<sup>3</sup> Nghut kôlhang, myiqhtoi htoí é sù yuq hkanmó gi, byu pé lé wum byi dang eq nhik tíng dang taí ri.

<sup>4</sup> Laklaí dang rahû nyo é sù gi, yhumsing gùng lé htuqbang byí ri, nghut kôlhang, myiqhtoi htoí é sù gi, noqkuq hpúng lé htuqbang byí ri.

<sup>5</sup> Ngò gi, nungmoq yuq hkanmó laklaí dang ahú hú pé nyò râ lé ô nau ri, nghut kôlhang, nungmoq myiqhtoi htoi râ lé je ô nau é nghut lhê. Hkâsu mù gâ le, laklaí dang ahú hú nyo é sù gi, haú noqkuq hpúng lé wó htuqbang râ matú, lichyúm lé taí sân kyô é za a nghut jáng, myiqhtoi htoi sù gi, yhang htoq je gyaú é nghut lhê.

<sup>6</sup> Ahkuí, gumang wui ê, ngò gi, nungmoq chyáng lé jé mù, laklaí dang pé nyo é nghut kôle, shing-rán nghut nghut, sumsé hpaqchyí nghut nghut, myiqhtoi dang nghut nghut, mhoqshit dang nghut nghut, nungmoq lé a taí kyô é nghut le gi, nungmoq é matú ngò hai akyû htoq râ lú?

<sup>7</sup> Htê lhoq htoq é asak a bo jung zè pé má lhang gi, sampyí nghut nghut, tíng nghut nghut, gam hkoq tô é htê a joq é nghut jáng, mut myhíng bat myhíng é htê haí nghut é lé, hkâsu wó sé râ lú?

<sup>8</sup> Dum, tut htê le gam hkoq é dông a mut kyô é nghut jáng, majan htoq râ rì rì ó yuq wá hên râ l hú?

<sup>9</sup> Nungmoq chyáng le haú dông nghut lhê. Nang, laklai dang ahú hú nyo le, sê gyô é danghkun mai nyo é za a nghut jáng, nang haí taí nyi é lé ó yuq wá hkâsu wó sé râ l hú? Nungmoq gi, maulat má za taí hâng pyâm nyi kó râ nghut lhê.

<sup>10</sup> Míngkan má dang ahú hú yhang joq é nghut lhê, nghut kôle, dang lichyúm a htoq é dang gi, a joq é nghut lhê.

<sup>11</sup> Haú mù luí, rayuq yuq haí taí nyi é lichyúm lé ngò a dat chyup é nghut jáng, ngò gi, haú dang taí su é matú maigan byù dut mù, yhang gi, ngá é matú maigan byù dut é nghut lhê.

<sup>12</sup> Nungmoq chyáng le haú dông nghut lhê. Nungmoq gi, woi-nyí hkyô eq sêng é chyunghuq pé lé gyai yhang ô nau nyi bekô nghut mù, haú noqkuq hpúng lé kô myhâng nhang é chyunghuq pé lé je ho shikut nyi keq.

<sup>13</sup> Haú nghut é yanmai, laklai dang ahú hú taí é sũ ó yuq le, yhang haú taí é lichyúm wó taí sân kyo sháng gaq, kyûdung râ dut lhê.

<sup>14</sup> Hkâsu mù gâ le, laklai dang ahú hú dông ngò kyûdung é nghut jáng, ngá é woi-nyí mai dúng é nghut lhê; nghut kôhang, ngá é myitnyân é matú, hai akyû a wó nghut ri.

<sup>15</sup> Haú mù, ngò hkâsu kut râ l hú? Ngò gi, ngá é woi-nyí mai le kyûdung râ, ngá é myitnyan mai le kyûdung râ nghut lhê; ngò gi, ngá é woi-nyí mai le mahkôn hkôn râ, ngá é myitnyan mai le mahkôn râ nghut lhê.

<sup>16</sup> Nungmoq gi, nungmoq é woi-nyí mai za Garai

Gasang lé hkya-on kô é nghut jáng, a sê gyô é bang mâ é rayuq gi, nungmoq haî taî é lé a sê é nghut mù, nungmoq jeju hkya-ôn é hkûn, "Amen" ga hkâsu wó taî râ lhú?

<sup>17</sup> Nungmoq gi, ge dik shoq jeju hkya-on kô é abe, nghut kôlhang, góbang gi, htuqbâng é a hui kó nghut ri.

<sup>18</sup> Ngò gi, nungmoq banshoq bâng htoq má laklaí dang ahú hú je wó taî é yanmai, Garai Gasang lé jeju bûn ri.

<sup>19</sup> Nghut kôlhang, noqkuq hpúng má, laklaí dang rahú dông danghkun ramun ngò taî râ htoq má, góbang lé mhoqshit râ akyû bo é dang ngo hkun taî râ lé ngò je ô nau ri.

<sup>20</sup> Gumang wuî ê, zoshâng wuî su myit nyi é lé nô pyám keq. Agè ashop hkyô eq sêng é má gi, nyheqnú dông kut mù, nungmoq myit é hkyô má gi, ko bang dông kut keq.

<sup>21</sup> Haû jep é tarâ má kê tô é gi,  
 "'A wó gyô wú é dang dông mai le, góming byu pê é  
 nhutwuî dông mai le, byù shí bang lé ngò taî  
 râ nghut lhê;  
 nghut kôlhang, yhangmoq gi, ngá dang gyo kó râ a  
 nghut.'

ga Yhumsîng taî ri."✧  
 gâ ri.

<sup>22</sup> Haû mù, laklaí dang ahú hú nyo é hkyô gi, lumjîng bâng matú kumlhá a nghut é za, a lumjîng bâng matú sheq ru nghut lhê. Myiqhtoi dang kúm gi, a lumjîng bâng matú a nghut é za, lumjîng bâng matú sheq ru nghut lhê.

---

✧ 14:21 Esai 28:11-12

<sup>23</sup> Haû nghut mù, noqkuq hpúng gón chôm zing mù, yuq hkanmó laklaí dang ahú hú nyò kô é nghut jáng, a sê gyô é bang nghut nghut, a lumjínng é bang nghut nghut, wang lé kô é hkûn, yhangmoq gi, nungmoq nâ bùm bekô ga a taí kó râ nghut lhê lhú?

<sup>24</sup> Nghut kôhang, yuq hkanmó, myiqhtoi dang taí nyi é u má, a lumjínng sù nghut nghut, a sê gyô é sù nghut nghut, wang lé é nghut jáng, yhang gi, yubak dap sù rayuq nghut é lé, banshoq èq lhoq pûn kyíng é hui râ eq, banshoq èq jéyáng é hui râ nghut é htoq agó,

<sup>25</sup> yhâng é i-myt má zaú tô é hkyô pé lé de de lhoq htoq shit é hui râ nghut lhê. Haû mù, yhang gi, ngóm gop luí, Garai Gasang lé noqkuq mù, "Garai Gasang gi, gè gè yhang, nungmoq chyáng rahá nghut nyi ri!" ga taí pyo htoq kat râ nghut lhê.

### *Shuq Shuq Tap Tap Za Noqkuq Râ Hkyô*

<sup>26</sup> Haû jáng, gumang wui ê, nga-nhúng haí taí râ lhú? Nungmoq rahá lé chôm zíng é hkûn, yuq hkanmó gi, Garai hkya-on mahkôn nghut nghut, mhoqshit é dang nghut nghut, shing-rán nghut nghut, laklaí dang ahú hú nyo é hkyô nghut nghut, taí sân kyô é nghut nghut pé lé, wó le ge ri. Haú pé banshoq gi, noqkuq hpúng lé wum-o byi râ matú chyat kut é dut râ lhê.

<sup>27</sup> Rayuq yuq, laklaí dang ahú hú nyo é nghut jáng, í yuq eq myô htum sum yuq mai a lai é za, rayuq htáng rayuq nyò râ dut é htoq agó, rayuq yuq haû lé taí sân kyo ra râ dut lhê.

<sup>28</sup> Taí san kyô é sù a nyi é nghut jáng, laklaí dang ahú hú nyo é sù gi, noqkuq hpúng má zim za nyi



râ dut mù, yhânggùng yhang eq Garai Gasang lé za nyo râ dut lhê.

<sup>29</sup> Myiqhtoi í yuq nghut nghut, sum yuq nghut nghut taí kyo râ dut lhê; góbang gi, haí taí é lé rago gyô chyam wú râ dut lhê.

<sup>30</sup> Nghut kôlhang, zung tô é sù rayuq yuq chyáng shing-rán jé é nghut jáng, hí taí nyi é sù gi, nô byuq râ dut lhê.

<sup>31</sup> Hkâsu mù gâ le, yuq hkangmó gi, mhoqshit é eq myit wum byi é wó hui kó sháng gaq, nungmoq banshoq bang gi, rayuq htâng rayuq myiqhtoi wó htoí é nghut lhê.

<sup>32</sup> Haú myiqhtoí pê é woi-nyí pé gi, myiqhtoí pé uphkanq é a-ô má nghut nyi ri.

<sup>33</sup> Hkâsu mù gâ le, Garai Gasang gi, atau ahú dut é Garai Gasang a nghut é za, nguingón hkyo é Garai Gasang ru nghut lhê.

Sân-yúng bâng zing tô é hpúng banshoq mâ é eq rajung za,

<sup>34</sup> myiwe wui gi, noqkuq hpúng pé má zim za nyi râ dut lhê. Yhangmoq gi, dang taí ahkáng a wó é nghut mù, haú jep é tarâ má bo é eq rajung za a-ô má nyi kó sháng gaq.

<sup>35</sup> Yhangmoq gi, rajung jung sé naú kô é nghut jáng, yhùm má yhangmoq é yhumsîng hpô pê chyáng myi kó sháng gaq; hkâsu mù gâ le, myiwe rayuq noqkuq hpúng má dang taí é gi, ahoq ahí hkyô nghut ri.

<sup>36</sup> Haú Garai Gasang é mungdang gi, nungmoq chyáng mai htoq lo é nghut lhê lhú? Haú gi, nungmoq chyáng za lé jé bê nghut lhê lhú?

<sup>37</sup> Rayuq yuq, yhang gi, myiqhtoi, a nghut jáng, woi-nyí chyunghuq byí é hui sù nghut lhê ga myit é nghut jáng, ngò, nungmoq lé ká byí é pé gi, haû Yhumsing é hkunmó nghut é lé, yhang sê yù sháng gaq.

<sup>38</sup> Yhang gi, haû lé haî su a ngàm kut é nghut jáng, yhânggùng le, haî su a ngàm kut é hui zo râ nghut lhê.

<sup>39</sup> Haû mù luî, ngá é gumang wui ê, myiqhtoi htoi râ lé ô nau nyi mù, laklaí dang ahú hú nyo é lé hkâhkûm pyám kó.

<sup>40</sup> Nghut kôlhang, jung hkangmó gi, htuk é dông eq shuq shuq tap tap zâ é hkyô dông kut é dut râ lhê.

## 15

### *Hkrisduq É Dui Toq Hkyô*

<sup>1</sup> Gumang wui ê, ngò, nungmoq lé hko kyo bê nghut mù, nungmoq le hap yù luî, nungmoq yap gîng tô é jowò nghut é gabú danglù hkyô lé, ahkuî, ngò, nungmoq lé lhoq pûn kat nau ri.

<sup>2</sup> Ngò, nungmoq lé hko kyo bê é mungdang lé, nungmoq gîng gîng myhik zing nyi kô é nghut jáng, nungmoq gi, gabú danglù hau é yanmai hkyi yù hui é nghut akô. Haû a nghut jáng, nungmoq lumjîng é gi, akôm dut bê nghut lhê.

<sup>3</sup> Ngò hap yu tô é pé lé, sâng-hi ahkyak é dông, ngò, nungmoq lé lai byi bê nghut lhê. Haú pé gi: Chyúmdang eq rajung za, Hkrisduq gi, nga-nhûng é yubak marâ é matú shí hkám byi bê gâ é nghut ri;

<sup>4</sup> Yhang gi, myhup yhûm é hui luî, Chyúmdang eq rajung za sum nyí nghu é nyí má lhoq dui toq é hui bê nghut mù,

<sup>5</sup> Petruq lé htoq shit luî, haû lagyo raxe í yuq lé le htoq shit ri.

<sup>6</sup> Hau htâng má, Yhang gi, ra-u má za, gumang wuì ngo shô yuq chyân lé htoq shit ri. Haú bang mâ é myo hpyang gi, ahkuî jé shoq asak dui nyi bum akô; ra-am kúm gi, shi ló byuq bekô nghut ri.

<sup>7</sup> Hau htâng, Yhang gi, Yakuq lé htoq shit mù lagyo pé banshoq bang lé htoq shit ri.

<sup>8</sup> Ló htâng má, Yhang gi, hkû buinyi a jé shî é má hku é dông nghut sù ngo lé le htoq shit bê nghut ri.

<sup>9</sup> Hkâsu mù gâ le, ngò gi, lagyo pé mâ é tiq dik sù nghut lhê. Haû Garai Gasâng é noqkuq hpúng lé zing-ri sù nghut é yanmai, ngò gi, lagyo rayuq nghû râ lháng a gingdán é sù nghut lhê.

<sup>10</sup> Nghut kôlhang, ngò ahkuî îsu wó nghut nyi é gi, Garai Gasâng jeju mai nghut lhê. Yhâng é jeju gi, ngá chyáng akôm a dut é za, ngò gi, yhangmoq banshoq bâng htoq má je riyhang mù wùn waq shikut lhê. Haú gi, ngò kut é a nghut, ngò eq rahá nghut nyi é Garai Gasâng jeju sheq ru nghut lhê.

<sup>11</sup> Haû mù luî, ngò nghut nghut, yhangmoq nghut nghut, ngamoq hko kyô é gi, haú hkyô chyat nghut lui, nungmoq lumjínng é le, haú hkyô nghut ri.

### *Shi Byuq Bâng É Dui Toq Hkyô*

<sup>12</sup> Nghut kôlhang, haû Hkrisduq shi é mai lhoq dui toq é hui bê hkyô lé hko kyô nyi bê nghut mù, nungmoq mâ é ra-am gi, shi byuq bâng é dui toq hkyô a joq nghû, hkâsu wó tái kó râ lú?

<sup>13</sup> Shi byuq bâng é dui toq hkyô a joq é ru nghut le gi, Hkrisduq le lhoq dui toq é hui berâ a nghut.

14 Hau htoq agó, Hkrisduq gi, lhoq dui toq é a huí é ru nghut le gi, ngamoq hko kyô é hkyô eq, nungmoq é lumjínq hkyô gi, akôm dut byuq râ nghut lhê.

15 Hau htoq agó, Garai Gasang gi, haû Hkrisduq lé shi é mai lhoq dui toq bê hkyô lé, ngamoq saksé hkám bê nghut é yanmai, ngamoq gi, Garai Gasâng é hkyô má saksé apyoq pé dut byuq râ za nghut lhê. Nghut kôlhang, shi byuq bang lhoq dui toq huí é hkyak a joq é ru nghut le gi, Garai Gasang, Yhang lé lhoq dui toq kat râ a nghut.

16 Hkâsu mù gâ le, haû shi byuq bang lhoq dui toq é a huí é nghut jáng, Hkrisduq le, lhoq dui toq é hui berâ a nghut.

17 Hkrisduq gi, lhoq dui toq é a huí é nghut jáng, nungmoq é lumjínq hkyô gi, akôm dut luí, nungmoq gi, nungmoq é yubak mara hkaû má ru nyi nyi shi kó râ nghut lhê.

18 Haû nghut jáng, Hkrisduq má shi ló byuq bê bang le, htên byoq byuq râ za nghut lhê.

19 Nga-nhúng gi, shí ipyat lhê é matú za, Hkrisduq má myit myoqbyù hkyô wó é nghut jáng, byù banshoq bâng htoq má shogyo rayhup dut é je hui zo bang dut kó râ nghut lhê.

20 Nghut kôlhang, Hkrisduq gi, gè gè yhang shi é mai lhoq dui toq é hui bê nghut mù, shi ló byuq bâng é sâng-hi ashi dut bê nghut ri.

21 Hkâsu mù gâ le, shî-nò hkyô gi, byù rayuq đông mai lò bê nghut é eq rajung za, shi byuq bâng é dui toq hkyô le, byù rayuq đông mai lo é nghut lhê.

22 Hkâsu mù gâ le, lhunghâng bang gi, Adam é yanmai shi byuq é su, lhunghâng bang gi, Hkris-

duq eq rading ralhú za nghut é yanmai lhoq dui toq é hui râ nghut lhê.

<sup>23</sup> Nghut kôlhang, yuq hkanmó gi, ó le ó âng é hkûn lhoq dui toq é hui râ nghut lhê: Hkrisduq gi, sâng-hi lhoq dui toq huî é sù nghut lhê. Hau htâng má, Yhang jé lé é hkûn, Yhang eq sêng é bang lhoq dui toq é hui râ nghut lhê.

<sup>24</sup> Hau htâng, jihâm jé râ nghut lhê; haú hkûn, Yhang gi, up é bang banshoq, ahkáng ayá eq a-tsam pé lé ban lhoq htên pyâm é htâng, haú Îwa nghut sù Garai Gasang lé mingdán ap byi râ nghut lhê.

<sup>25</sup> Hkâsu mù gâ le, Yhang gi, Yhâng é gye pé banshoq lé, Yhâng é hkyî wang ô má tô pyâm é hkûn jé shoq up nyi ra râ nghut lhê.

<sup>26</sup> Haú lhoq htên pyâm é hui râ nghut é ló htâng é gye gi, shî-nò hkyô nghut ri.

<sup>27</sup> Hkâsu mù gâ le, "Garai Gasang gi, jung hkanmó lé, Yhâng é hkyî wang ô má tô pyám bê nghut ri."☆ gâ Chyúmdang má kê tô ri. "Jung hkanmó lé" Yhâng é a-ô má tô pyám bê ga taî é hkûn, jung hkanmó lé Hkrisduq é a-ô má tô pyám bê sù Garai Gasang yhang kúm a lom é hkyô, san za nghut nyi ri.

<sup>28</sup> Yhang gi, haú hkyô ban kut é htâng má, haú Zo yhang le, jung hkanmó lé Yhâng é a-ô má to byi bê sù Garai Gasang é a-ô má nyi sù dut nhang é hui râ nghut mù, Garai Gasang gi, lhunglhâng htoq má gyaú sù nghut luî, lhunglhang lé sîng sù nghut râ nghut lhê.

<sup>29</sup> Dui toq hkyô a joq é ru nghut le gi, shi byuq bê

---

☆ 15:27 Hkya-on 8:6

bâng é matú wui-myhup hkám byî bùm kô é gi, hai akyû bò kó râ lú? Haû shi byuq bang lhoq dui toq é a hui kô é ru nghut le gi, yhangmoq matú haî mù byu pé wui-myhup hkâm yù kó râ lú?

<sup>30</sup> Ngamoq gi, ngamoq é matú, hkyíng hkangmó haî mù chiq râ jowò má nyi râ lê lú?

<sup>31</sup> Gumang wui ê, ngò gi, nyi wui aluq shoî shoî shi é hui zô é nghut lê. Haû su nghû é gi, nga-nhûng é Yhumsíng Hkrisduq Yesuq má, nungmoq é hkyô lé ngò hkyak wó gumrong é yanmai nghut lê.

<sup>32</sup> Ngò gi, xângzo hkyam dông mai za, Ehpesu myuq má tân jung dusak pé lé majan zân nyi é nghut jáng, ngá é matú hai akyû bò râ lú? Shi byuq bang lhoq dui toq é a huí é ru nghut le gi, "Nga-nhúng gi, napmá shî râ nghut é yanmai, zo sháng, shuq sháng."<sup>☆</sup>

ngghû râ za nghut lê.\*

<sup>33</sup> "A ge é zùm yap luzúm wui gi, ge é nyi yap sâmlai lé hten nhang é nghut lê." gâ é sanghkyang eq rajung za, hkyô shuî nghoq é hkâhui zo kó!

<sup>34</sup> Nungmoq gi, tau bûn gyîng lò mù, mara hkâkut shut lo kó; hkâsu mù gâ le, Garai Gasang lé a sê é byù ra-am nyi akô. Ngò haû su nghû taí é gi, nungmoq hoq bun râ matú nghut lê.

### *Dui Toq É Gungdu*

<sup>35</sup> Nghut kôlhang, rayuq yuq gi, "Haû shi byuq bê bang, hkâsu kut lhoq dui toq é hui kó râ lú? Yhangmoq gi, hkasû é gungdu nghut kó râ lú?" ga myi râ nghut lê.

<sup>☆</sup> 15:32 Esai 22:13      \* 15:32 Dang ngho shî gi, a lumjîng bang taí é dang nghut lê.

<sup>36</sup> Haû-í nghâ sù ê! Nàng hô hkyô kat é pé gi, shi byuq é za a nghut jáng, yuq htoq lô râ a nghut mhai.

<sup>37</sup> Nàng, kyô hkyô é hkûn, yuq lò râ nghut é agàm lé hô hkat e a nghut é za, sungsô amyui nghut nghut, gotû amyui rajung jung nghut nghut lé za hô kat é ru nghut lhê.

<sup>38</sup> Nghut kôlhang, Garai Gasang gi, Yhang myit hpyit to bê eq rajung za haû lé gungdu ralhum byi mù, kyôshi myui hkangmó lé, ó le ô é gungdu byí ri.

<sup>39</sup> Gungsho lhunglhang gi, rajung za a nghut. Byù pé é gungsho gi, rajung, dusak pé é gi, gó jung, ngoq pé é gi, gó jung, ngozo pé é gi, gó jung ru nghut lhê.

<sup>40</sup> Mauhkûng gùng pé le joq é nghut luí, myidam gùng pé le joq ri; nghut kôlhang, mauhkûng gùng pé é shingkang gi, rajung, myidam gùng pé é shingkang gi, gó jung ru nghut lhê.

<sup>41</sup> Haû bui má bo é shingkang gi, rajung, lhamó mâ é gi, gó jung, kyí pé mâ é gi, gó jung ru nghut lhê; kyí racham eq rachâm é shingkang le gotû tû shai lhûm lhê.

<sup>42</sup> Haû mù, shi byuq bê bâng é dui toq hkyô le, haû eq rajung za nghut ri. Haû hô hkyô kat é gungdu gi, htên byoq sê é nghut luí, lhoq dui toq huí é gungdu kúm gi, htên byoq a sê é nghut lhê.

<sup>43</sup> Hô hkyô kat é hkûn gi, aróng a bò, lhoq dui toq huí é hkûn gi, hpungwup shingkang bo ri. Hô hkyô kat é hkûn gi, wum nyhóm mù, lhoq dui toq huí é hkûn gi, a-tsam bo ri.

<sup>44</sup> Gungsho gungdu gi, hô hkyô é hui mù, woi-nyí gungdu gi, lhoq dui toq é huí ri.

Gungsho gungdu joq é nghut le gi, woi-nyí gungdu le joq é nghut lhê.

<sup>45</sup> Haû nghut mù, "Haû sâng-hi yuq byù Adam gi, asak dui é xângzo dut bê nghut ri."✠ ga kê tô ri. Haû ló htâng é Adam kúm gi, asak byî é woi-nyí nghut ri.†

<sup>46</sup> Haû woi-nyí eq sêng é hí lé joq é a nghut é za, gungsho eq sêng é hí lé joq é htâng má sheq, woi-nyí eq sêng é lé joq é ru nghut lhê.

<sup>47</sup> Haû sâng-hi yuq byù gi, myidàm mâ é tseyûn lé sai é nghut mù, htang lhê yuq byù gi, mauhkûng htoq mâ é nghut ri.

<sup>48</sup> Haû myidàm byù nghut sù su, myidàm eq sêng é bang le nghut nyi akô; haû mauhkûng htoq mâ é byù nghut sù su, mauhkûng eq sêng é bang le nghut nyi akô.

<sup>49</sup> Nga-nhúng gi, myidàm byù é gunghkyâng isâm lé hkam yù bê nghut é su, mauhkûng htoq mâ é byu é gunghkyâng isâm lé le myang hkam yù râ nghut lhê.

<sup>50</sup> Gumang wuì ê, ngò, nungmoq lé shit kyo kôlé, gungsho eq sui gi, Garai Gasâng é mingdán é silí wunlí lé wó yù râ a nghut, htên byoq sê é le, htên byoq a sê é silí wunlí lé wó yù râ a nghut.

<sup>51</sup> Gyo to keq, zaú tô é hkyô lé, ngò, nungmoq lé tái kyo kôlé: Nga-nhúng banshoq bang gi, shi byuq râ a nghut é za, htaì lhik é hui râ ru nghut lhê.

<sup>52</sup> Haû gi, ló htâng é tut htê mying é hkûn, rallhap za, myoqkuq ralap má dut râ nghut lhê. Hkâsu mù gâ le, tut htê mying râ nghut lhê, haú hkûn, shi byuq bê bang gi, htên byoq a sê é shut lhoq dui toq

---

✠ 15:45 Apûn 2:7 † 15:45 Ló htâng é Adam gi, Yesuq lé tái nau é nghut lhê.



yu é hui râ nghut mù, nga-nhúng gi, htaí lhik é hui râ nghut lhê.

<sup>53</sup> Hkâsu mù gâ le, htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yù râ dut é nghut lhê.

<sup>54</sup> Haû htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yu é hkûn sheq, "Shî-nò hkyô gi, ùng budâng eq myui pyâm é hui bê nghut ri."✧ ga kê tô é eq,

<sup>55</sup> "Shî-nò hkyô ê, náng é ùng budang gi, hkâmá lhú? Shî-nò hkyô ê, náng é nyin gi, hkâmá lhú?"✧ gâ tô é sanghkyang gi, dik râ nghut lhê.

<sup>56</sup> Haû shî-nò hkyo é nyin gi, yubak mara nghut ri; yubak marâ é a-tsam gi, jep é tarâ nghut ri.

<sup>57</sup> Nghut kôlhang, Garai Gasang lé jeju hkya-ôn lhê! Yhang gi, nga-nhúng é Yhumsing Yesuq Hkrisduq dông mai, nga-nhúng lé ùng budang byí é nghut ri.

<sup>58</sup> Haû mù luí, ngá é chyitdap gumang wuì ê, yap gingtîng nyì keq. Hai èq le, nungmoq lé hkâlhoq ðui nún nhâng kó. Nungmoq gi, haû Yhumsing má nungmoq wùn waq é muzó akôm a nghut é lé sé kê é nghut lhê yanmai, haû Yhumsing é muzó lé ayang wùn waq shikut nyì keq.

## 16

*Yerusalem Wà Mó Mâ É Lumjîng Bâng É Matú Alu Hkyuí Râ Hkyô*

<sup>1</sup> Ahkuí, Garai Gasâng é byu pê é matú alu hkyuí râ hkyô eq séng luí gi, haû Galatiq mau mâ é noqkuq hpúng pé lé ngò kut nhang é su kut keq.

<sup>2</sup> Ngò jé lé é hkûn, alu hkyuî râ hkyô a kut ra râ dông, bat hkanmó mâ é sâng-hi nyí má, yuq hkanmó gi, yhumsîng wó ho é má cháng mù, gam tô to láng keq.

<sup>3</sup> Ngò jé lé é hkûn, ngò gi, nungmoq hkyin tô é byu pé lé, shit kyô é laiká pé byi mù, nungmoq é chyunghuq lé, Yerusalem wà mó má ê dé nhâng râ nghut lhê.

<sup>4</sup> Ngò le ê ang râ dut é nghut jáng, yhangmoq gi, ngá é byinzùm kut râ nghut lhê.

### *Poluq Lum Kat É Hkyô Pé*

<sup>5</sup> Ngò gi, Makedoni mau laî byit é htâng, nungmoq chyáng jé lé râ nghut lhê. Hkâsu mù gâ le, ngò gi, Makedoni mau laî byit râ za nghut lhê.

<sup>6</sup> Ngò hkâmá ê kôlhang, ngá é hkyowuì má nungmoq wó garúm kat kó râ matú, ngò gi, rayoq zo nghut nghut, gyoqmyò lhang lai shoq nghut nghut, nungmoq eq rahá nyi abe.

<sup>7</sup> Ngò gi, laî ló uchyang za nungmoq lé lé kum râ nghut mù, ahkuî wó myâng râ lé a nau é nghut lhê; ngò gi, haû Yhumsîng dông é nghut jáng, nungmoq eq rahá rayoq nyi râ lé myit myoqbyu lhê.

<sup>8</sup> Nghut kôlhang, ngò gi, Penteko-ti poî buinyi jé shoq Ehpesu myuq má nyi râ nghut lhê.

<sup>9</sup> Haî mù gâ le, ngo lé htuq htîng é bang myo myo nyi é nghut kôlhang, akyû htoq é muzó é matú hkum mó ngo lé hpông to byî é yanmai nghut lhê.

<sup>10</sup> Timohti jé lé jáng, yhang, nungmoq eq rahá nyi é u má, gyuq é hkyô haî le a joq râ matú wú byi keq; hkâsu mù gâ le, yhang gi, haû Yhumsing é muzó lé, ngò su wùn waq wún é sù nghut lhê.

11 Haû mù, ó yuq le, yhang lé hkâwú shóm kó. Yhang gi, ngá chyáng wó dum taû jé sháng gaq, yhâng é hkyowuì má nguingón é dông nhang kat keq. Haû gumang wuì eq rahá lò kó râ lé, ngò myit láng nyi lhê.

12 Ahkuì, nga-nhông é gumang Apolo é hkyô eq séng luí ga jang: yhang gi, haû gumang wuì eq rahá nungmoq chyáng lé râ lé, ngò, gyai yhang wum taí tsuq lhê. Yhang kúm gi, ahkuì lé nau é myit a dê bò shi, nghut kôlhang, yuqyo é ahkyíng wó jáng, yhang lé lô râ nghut lhê.

13 Machya nyí keq; lumjíng hkyô má ging ging tíng tíng yap nyí keq; gyuq kyum myit hkâbô kó; wum bo nyí keq.

14 Jung hkgangmó lé, chyitdap myit eq zui saí keq.

15 Stehpana eq yhâng é yhumbyù wuì gi, Ahkaia ming má sâng-hi hpúng wâng bang nghut luí, yhangmoq gi, yhumsíng gùng lé, haû sân-yúng bâng é dojaú hkyô má ap nóng bekô lé, nungmoq sê akô nghut ri. Gumang wuì ê, ngò, nungmoq lé wum taí tsuq kat kôlé,

16 haû sù é bâng é a-ô má le, haû muzó má bo wang lòm mù, mù zui shikut bang yuq hkgangmó é a-ô má le, nyí keq.

17 Ngò gi, Stehpana, Hportunatu eq Ahkaiku pé jé lo é hkùn, gyai gabú é nghut lhê, haí mù gâ le, yhangmoq gi, nungmoq a kut byí é hkyô lé, lhoq pyíng byi bekô nghut ri.

18 Hkâsu mù gâ le, yhangmoq gi, ngá é woi-nyí eq nungmoq é woi-nyí lé lhoq ngón byi bekô nghut ri. Haû sù é bang lé, hpautap nyí keq.

*Ló Htâng É Shi-kyám Dang*

<sup>19</sup> Asia mau mâ é noqkuq hpúng pé gi, nungmoq lé shi-kyâm kat akô. Akula eq Priskila nhik le, yhangnhik é yhûm má chôm huî é noqkuq hpúng lé, haû Yhumsîng má nungmoq lé gyai yhang shi-kyâm kat akô.

<sup>20</sup> Shí má nyi é gumang wuî banshoq bang gi, nungmoq lé shi-kyâm kat akô. Rayuq eq rayuq chyoiyúng é chytpuq èq shi-kyâm lhum keq.

<sup>21</sup> Ngò, Poluq gi, shi-kyám dang shî lé, ngá é loq èq yhang ká é nghut lhê.

<sup>22</sup> Rayuq yuq, haû Yhumsîng lé a chyt dap é nghut jáng, haû yuq gi, nhîng pyâm é hui sháng gaq. Yhumsîng ê, jé lé aq hkoi!

<sup>23</sup> Haû Yhumsîng Yesuq é jeju gi, nungmoq eq rahá nghut nyî sháng gaq.

<sup>24</sup> Ngá é chyt dap myit gi, Hkrisduq Yesuq má nungmoq banshoq bâng chyáng joq nyî sháng gaq. Amen.

# **Chyoiyúng chyumlaiká: dangshikaq asik; Zaiwa**

## **New Testament in Zaiwa**

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

### **Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

### **The New Testament**

in Zaiwa

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022

23f9fc55-a8a4-59ef-9513-707ec336b0ee